

# 大般涅槃經

(三十六卷：第十六卷至第十八卷)

北涼天竺三藏曇無讖譯 梵

宋沙門慧嚴慧觀同謝靈運再治



南無本師釋迦牟尼佛

## 說明

本繁體校正版《大般涅槃經》(南本)電子書，是根據《乾隆大藏經》大乘涅槃部，第0110部，北涼天竺三藏曇無讖譯梵、宋沙門慧嚴慧觀同謝靈運再治《大般涅槃經》(36卷)影印本校正的。標點符號僅供參考。

為了便於讀誦，本電子書按順序每三卷合為一冊，共十二冊。若每天讀一冊，可十二天讀完。

本電子書是免費結緣品。特此說明。

仁慧草堂

二〇一八年十月

## 目 錄

起誦儀 .....	- 1 -
香讚 .....	- 1 -
開經偈 .....	- 1 -
大般涅槃經卷第十六 .....	- 2 -
梵行品第二十之三 .....	- 2 -
大般涅槃經卷第十七 .....	- 40 -
梵行品第二十之四 .....	- 40 -
大般涅槃經卷第十八 .....	- 70 -
梵行品第二十之五 .....	- 70 -
嬰兒行品第二十一 .....	- 94 -
結誦儀 .....	- 98 -
補闕真言 .....	- 98 -
發願文 .....	- 98 -
迴向偈 .....	- 99 -
迴向偈 .....	- 99 -
三皈依 .....	- 100 -

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 開經偈

(一編)

無上甚深微妙法 百千萬劫難遭遇  
我今見聞得受持 願解如來真實義

# 大般涅槃經卷第十六

北涼天竺三藏曇無讖譯 梵

宋沙門慧嚴慧觀同謝靈運再治

## 梵行品第二十之三<sup>1</sup>

迦葉菩薩言：「如佛世尊為舍利弗說：『世間知者，我亦得知；世間不知，我亦悉知。』其義云何？」

「善男子，一切世間不知、不見、不覺佛性；若有知、見、覺佛性者，不名世間，名為菩薩。世間之人亦復不知、不見、不覺十二部經、十二因緣、四倒、四諦、三十七品、阿耨多羅三藐三菩提、大般涅槃；若知、見、覺者，不名世間，當名菩薩。善男子，是名世間不知、見、覺。

「云何世間所知、見、覺？所謂：梵天、自在天、八臂天、性時微塵法及非法是造化主、世界終始、斷常二見，說言初禪至非非想名為涅槃。善男子，是名世間所知、見、覺。菩薩摩訶薩於如是事亦知、見、覺。菩薩如是知、見、覺已，若言不知、不見、不覺，是為虛妄。虛妄之法則

<sup>1</sup> 大正藏：梵行品之三

為是罪，以是罪故，墮於地獄。善男子，若男、若女、若沙門、若婆羅門說言：『無道、菩提、涅槃。』當知是輩名一闍提、魔之眷屬，名為謗法。如是謗法名謗諸佛。如是之人不名世間、不名非世間。」

爾時，迦葉聞是事已，即以偈頌而讚歎佛：

大慈憫眾生 故令<sup>2</sup>我歸依  
善拔眾毒箭 故稱大醫王  
世醫所療治 雖差還復生  
如來所治者 畢竟不復發  
世尊甘露藥 以施諸眾生  
眾生既服已 不死亦不生  
如來今為我 演說大涅槃  
眾生聞祕藏 即得不生滅

迦葉菩薩說是偈已，即白佛言：「世尊！如佛所說『一切世間不知、見、覺，菩薩悉能知、見、覺』者，若使菩薩是世間者，不得說言：『世間不知、不見、不覺。』而是菩薩能知、見、覺，若非世間，有何異相？」

佛言：「善男子，言菩薩者，亦是世間、亦非世間。不知、見、覺者，名為世間；知、見、

<sup>2</sup> 大正藏：今

覺者，不名世間。汝言有何異者，我今當說。善男子，若男若女，若有初聞是涅槃經即生敬信，發阿耨多羅三藐三菩提心，是則名為世間。菩薩一切世間不知、見、覺，如是菩薩亦同世間，不知、見、覺。菩薩聞是涅槃經已，知有世間不知、見、覺，應是菩薩所知、見、覺。知是事已，即自思惟：『我當云何方便修習，得知、見、覺？』覆復<sup>3</sup>念言：『唯當深心修持淨戒。』

「善男子，菩薩爾時，以是因緣，於未來世，在在生處，戒常清淨。善男子，菩薩摩訶薩以戒淨故，在在生處，常無憍慢、邪見、疑網，終不說言：『如來畢竟入於涅槃。』是名菩薩修持淨戒。戒既清淨，次修禪定。以修定故，在在生處，正念不忘，所謂一切眾生悉有佛性，十二部經，諸佛世尊常、樂、我、淨，一切菩薩安住方等大涅槃經悉見佛性，如是等事憶而不忘。因修定故，得十一空，是名菩薩修清淨定。戒定已備，次修淨慧。以修慧故，初不計著身中有我、我中有身、是身是我、非身非我，是名菩薩修習淨慧。以修慧故，所受持戒牢固不動。善男子，譬如須彌，不為四風之所傾動；菩薩摩訶薩亦復如是，不為

<sup>3</sup> 大正藏：自

四倒之所傾動。善男子，菩薩爾時，自知、見、覺，所受持戒無有傾動，是名菩薩所知、見、覺，非世間也。

「善男子，菩薩見所持戒牢固不動，心無悔恨；無悔恨故，心得歡喜；得歡喜故，心得悅樂；得悅樂故，心則安隱；心安隱故，得無動定；得無動定故，得實知見；得實知見故<sup>4</sup>，厭離生死；厭離生死故，便得解脫；得解脫故，明見佛性。是名菩薩所知、見、覺，非世間也。

「善男子，是名世間不知、見、覺，而是菩薩所知、見、覺。」

迦葉復言：「云何菩薩修持淨戒心無悔恨乃至明了見於佛性？」

佛言：「善男子，世間戒者，不名清淨。何以故？世間戒者，為於有故，性不定故，非畢竟故，不能廣為一切眾生，以是義故，名為不淨；以不淨故，有悔恨心；以悔恨故，心無歡喜；無歡喜故，則無悅樂；無悅樂故，則無安隱；無安隱故，無不動定；無不動定故，無實知見；無實知見故，則無厭離；無厭離故，則無解脫；無解脫故，不見佛性；不見佛性故，終不能得大般涅槃。」

<sup>4</sup> 大正藏：實知見故；永樂北藏及龍藏：得實知見故



槃。是名世間戒不清淨。

「善男子，菩薩摩訶薩清淨戒者，戒非戒故，非為有故，定畢竟故，為眾生故，是名菩薩戒清淨也。

「善男子，菩薩摩訶薩於淨戒中，雖不欲生無悔恨心，無悔恨心自然而生。善男子，譬如有人，執持明鏡，不期見面，面像自現。亦如農夫，散種良田<sup>5</sup>，不期生芽，而芽自生。亦如然燈，不期滅闇，而闇自滅。善男子，菩薩摩訶薩堅持淨戒，無悔恨心自然而生，亦復如是。以淨戒故，心得歡喜。

「善男子，如端正人，自見面貌，心生歡喜；持淨戒者亦復如是。

「善男子，破戒之人，見戒不淨，心不歡喜。如形殘者，自見面貌，不生喜悅；破戒之人，亦復如是。

「善男子，譬如牧牛，有二女人，一持酪瓶，一持漿瓶，俱共至城，而欲賣之。於路脚跌，二瓶俱破，一則歡喜，一則愁惱。持戒破戒亦復如是，持淨戒者心則歡喜，心歡喜故，則便思惟：『諸佛如來於涅槃中說：「有能持清淨戒者，則

<sup>5</sup> 大正藏：種之良田；永樂北藏及龍藏：散種良田

得涅槃。」我今修習如是淨戒，亦應得之。』以是因緣，心則悅樂。」

迦葉復言：「喜之與樂，有何差別？」

「善男子，菩薩摩訶薩不作惡時，名為歡喜；心淨持戒，名之為樂。善男子，菩薩摩訶薩觀於生死，則名為喜；見大涅槃，名之為樂。下，名為喜；上，名為樂。離世共法，名之為喜；得不共法，名之為樂。以戒淨故，身體輕柔，口無麤過。菩薩爾時，若見、若聞、若嗅、若嘗、若觸、若知悉無諸惡；以無惡故，心得安隱；以安隱故，則得靜定；得靜定故，得實知見；實知見故，厭離生死；厭生死故，則得解脫；得解脫故，得見佛性；見佛性故，得大涅槃。是名菩薩清淨持戒，非世間戒。何以故？善男子，菩薩摩訶薩所受淨戒，五法佐助。云何為五？一，信；二，慚；三，愧；四，善知識；五，增<sup>6</sup>敬戒。離五蓋故，所見清淨。離五見故，心無疑網。離五疑故，一者、疑佛；二者、疑法；三者、疑僧；四者、疑戒；五者、疑不放逸，菩薩爾時，即得五根，所謂信、念、精進、定、慧；得五根故，得五種涅槃，謂色解脫乃至識解脫。是名菩薩清淨持戒，非世間

<sup>6</sup> 大正藏：宗

也。

「善男子，是名世間之所不知、不見、不覺，而是菩薩所知、見、覺。

「善男子，若我弟子受持、讀誦、書寫、演<sup>7</sup>說大涅槃經有破戒者，有人呵責、輕賤、毀辱而作是言：『若佛祕藏大涅槃經有威力者，云何令汝毀所受戒？若人受持是涅槃經毀禁戒者，當知是經為無威力。若無威力，雖復讀誦為無利益。』緣是輕毀涅槃經故，復令無量無邊眾生墮於地獄。受持是經而毀戒者，則是眾生大惡知識<sup>8</sup>，非我弟子，是魔眷屬。如是之人，我亦不聽受持是典，寧使不受、不持、不修，不以毀戒受持修習。

「善男子，若我弟子受持、讀誦、書寫、演說涅槃經者，當正身心，慎莫掉<sup>9</sup>戲輕躁舉動。身為掉戲，心為輕動。求有之心名為輕動，身造諸業名為掉戲。若我弟子求有、造業，不應受持是大乘典大涅槃經。若有如是受持經者，人當輕呵而作是言：『若佛祕藏大涅槃經有威力者，云何令汝求有、造業？若持經者，求有、造業，當知是經為無威力。若無威力，雖復受持為無利益。』

<sup>7</sup> 大正藏：解

<sup>8</sup> 大正藏：惡知識也；永樂北藏及龍藏：大惡知識

<sup>9</sup> 大正藏：調

緣是輕毀涅槃經故，復令無量無邊眾生墮於地獄。受持是經求有、造業，則是眾生大惡知識<sup>10</sup>也，非我弟子，是魔眷屬。

「復次，善男子，若我弟子受持、讀誦、書寫、演說是<sup>11</sup>涅槃經，莫非時說，莫非國說，莫不請說，莫輕心說，莫處處說，莫自歎說，莫輕他說，莫滅佛法說，莫熾然世法說。善男子，若我弟子受持是經非時而說，乃至熾然世法說者，人當輕呵而作是言：『若佛祕藏大涅槃經有威力者，云何令汝非時而說，乃至熾然世法而說？若持經者作如是說，當知是經為無威力。若無威力，雖復受持為無利益。』緣是輕毀涅槃經故，令無量眾生墮於地獄。受持是經非時而說，乃至熾然世法而說，則是眾生惡知識<sup>12</sup>也，非我弟子，是魔眷屬。

「善男子，若欲受持者、說大涅槃者、說佛性者、說如來祕藏者、說大乘者、說方等經者、說聲聞乘者、說辟支佛乘者、說解脫者、見佛性者，先當清淨其身。以身淨故，則無呵責；無呵責故，令無量人於大涅槃生清淨信；信心生故，

<sup>10</sup> 大正藏：惡知識；永樂北藏及龍藏：大惡知識

<sup>11</sup> 大正藏：大

<sup>12</sup> 大正藏：惡知識；永樂北藏及龍藏：大惡知識

恭敬是經，若聞一偈、一句、一字及說法者，則便得發<sup>13</sup>阿耨多羅三藐三菩提心。當知是人則是眾生真善知識，非惡知識，是我弟子，非魔眷屬。是名菩薩非世間也。

「善男子，是名世間之所不知、不見、不覺，而是菩薩所知、見、覺。」

「復次，善男子，云何復名一切世間所不知、見、覺，而是菩薩所知、見、覺？所謂六念處。何等為六？念佛、念法、念僧、念戒、念施、念天。」

「善男子，云何念佛？如來、應、正遍知、明行足、善逝、世間解、無上士、調御丈夫、天人師、佛、世尊，常不變易，具足十力、四無所畏、大師子吼，名大沙門、大婆羅門、大淨、畢竟到於彼岸、無能勝者、無見頂者、無有怖畏、不驚不動、獨一無侶、無師自悟、疾智、大智、利智、深智、解脫智、不共智、廣普智、畢竟智、智寶成就、人中象王、人中牛王、人中龍王、人中丈夫、人中蓮華、分陀利華、調御人師，為大施主，為大法師<sup>14</sup>。以知法故，名大法師；以知

<sup>13</sup> 大正藏：則得發於；永樂北藏及龍藏：則便得發

<sup>14</sup> 大正藏：大法之師；永樂北藏及龍藏：為大法師

義故，名大法師；以知時故，名大法師；以知足故，名大法師；以知我故，名大法師；知大眾故，名大法師；以知眾生種種性故，名大法師；以知諸根利、鈍、中故，名大法師；說中道故，名大法師。

「云何名如來？如過去諸佛所說不變。云何不變？過去諸佛為度眾生說十二部經；如來亦爾，故名如來。

「諸佛世尊從六波羅蜜、三十七品、十一空來至大涅槃；如來亦爾，是故號佛為如來也。

「諸佛世尊為眾生故，隨宜方便，開示三乘，壽命無量，不可稱計；如來亦爾，是故號佛為如來也。

「云何為應？

「世間之法，悉名為怨<sup>15</sup>，佛應害故，故名為應。夫四魔者是菩薩怨，諸佛如來為菩薩時，能以智慧破壞四魔，是故名應。復次，應者名為遠離。為菩薩時，應當遠離無量煩惱，故名為應。復次，應者名樂。過去諸佛為菩薩時，雖於無量阿僧祇劫為眾生故受諸苦惱，終無不樂，而常樂之。如來亦爾，是故名應。又復，應者，一切人

<sup>15</sup> 大正藏：悉名怨家；永樂北藏及龍藏：悉名為怨

天應以種種香華、瓔珞、幢幡、妓樂而供養之，故名為應<sup>16</sup>。

「云何正遍知？正者，名不顛倒；遍知者，於四顛倒無不通達。又復，正者，名為苦行；遍知者，知因苦行定有苦果。又復，正者，名世間中；遍知者，畢竟定知修習中道得阿耨多羅三藐三菩提。又復，正者，名為可數、可量、可稱；遍知者，不可數、不可量、不可稱。是故號佛為正遍知。

「善男子，聲聞、緣覺亦有遍知，亦不遍知。何以故？遍者<sup>17</sup>，名五陰、十二入、十八界，聲聞、緣覺亦得遍知，是名遍知。云何不遍知？善男子，假使二乘於無量劫觀一色陰不能盡知，以是義故，聲聞、緣覺無有遍知。

「云何明行足？明者，名得無量善果；行者，名為脚足<sup>18</sup>；善果者，名阿耨多羅三藐三菩提。脚足者，名為戒、慧。乘戒、慧足得阿耨多羅三藐三菩提，是故名為明行足<sup>19</sup>。又復，明者，名呪；行者，名吉；足者，名果。善男子，是名世間義。呪者，名為解脫；吉者，名為阿耨多羅三

<sup>16</sup> 大正藏：是故名應；永樂北藏及龍藏：故名為應

<sup>17</sup> 大正藏：遍知者；永樂北藏及龍藏：遍者

<sup>18</sup> 大正藏：行名脚足；永樂北藏及龍藏：行者，名為脚足

<sup>19</sup> 大正藏：明行足也；永樂北藏及龍藏：明行足

藐三菩提；果者，名為大般涅槃。是故，名為明行足<sup>20</sup>。又復，明者，名光；行者，名業；足者，名果。善男子，是名世間義。光者，名不放逸；業者，名六波羅蜜；果者，名為阿耨多羅三藐三菩提。又復，明者，名為三明：一，菩薩明；二，諸佛明；三，無明明。菩薩明者，即是般若波羅蜜；諸佛明者，即是佛眼；無明明者，即是<sup>21</sup>畢竟空。行者，於無量劫，為眾生故，修諸善業。足者，明見佛性。以是義故，名明行足。

「云何善逝？善者，名高；逝，名不高。善男子，是名世間義。高者，名為阿耨多羅三藐三菩提；不高者，即如來心也。善男子，心若高者，不名如來。是故，如來名為善逝。又復，善者，名為善知識；逝者，善知識果。善男子，是名世間義。善知識者，即初發心；果者，名為大般涅槃。如來不捨最初發心得大涅槃，是故，如來名為善逝。又復，善者，名好；逝者，名有。善男子，是名世間義。好者，名見佛性；有者，名大涅槃。

「善男子，涅槃之性實非有也，諸佛世尊因

<sup>20</sup> 大正藏：明行足也；永樂北藏及龍藏：明行足

<sup>21</sup> 大正藏：即；永樂北藏及龍藏：即是



世間故，說言是有。善男子，譬如世人，實無有子，說言有子；實無有道，說言有道。涅槃亦爾，因世間故，說言是<sup>22</sup>有。諸佛世尊成大涅槃，故名善逝。

「云何世間解<sup>23</sup>？世間者<sup>24</sup>，名為五陰；解者，名知。諸佛世尊善知五陰，故名世間解。又，世間者，名為五欲；解，名不著。不著五欲，故名世間解。又，世間者<sup>25</sup>，東方無量阿僧祇世界一切聲聞、緣<sup>26</sup>覺不知、不見、不解，諸佛悉知、悉見、悉解；南、西、北方、四維、上、下亦復如是。是故，號佛為世間解。又，世間者，一切凡夫；解者，知諸凡夫善惡因果。非是聲聞、緣覺所知，唯佛能知，是故號佛為世間解。又，世間者，名曰蓮華；解，名不污。善男子，是名世間義。蓮華者，即是如來；不污者，如來不為世間八法之所污染<sup>27</sup>。是故，號佛為世間解。又，世間解者，諸佛菩薩名世間解。何以故？諸佛菩薩見世間故，故名世間解。善男子，如因食得命，名食為命；諸佛菩薩亦復如是，見世間故，故名

<sup>22</sup> 大正藏：說言為有

<sup>23</sup> 大正藏：善男子，云何世間解；永樂北藏及龍藏：云何世間解

<sup>24</sup> 大正藏：善男子，世間者；永樂北藏及龍藏：世間者

<sup>25</sup> 大正藏：世間解者；永樂北藏及龍藏：世間者

<sup>26</sup> 大正藏：獨

<sup>27</sup> 大正藏：染污；永樂北藏及龍藏：污染

世間解。

「云何無上士？上士者，名之為斷；無所斷者，名無上士。諸佛世尊無有煩惱，故無所斷，是故號佛為無上士。又，上士者，名為諍訟；無上士者，無有諍訟。如來無諍，是故號佛為無上士。又，上士者，名語可壞；無上士者，語不可壞。如來所言，一切眾生所不能壞，是故號佛為無上士。又，上士者，名為上座；無上士者，名無上座。三世諸佛更無過者，是故號佛為無上士。上者，名新；士者，名故。諸佛世尊體大涅槃無新無故，是故號佛為無上士。

「云何調御丈夫？自既丈夫，復調丈夫。善男子，如來者<sup>28</sup>，實非丈夫，非不丈夫。因調丈夫故<sup>29</sup>，故名如來為丈夫也。善男子，一切男女若具四法，則名丈夫。何等為四？一，近善知識<sup>30</sup>；二，能聽法；三，思惟義；四，如說修行。善男子，若男若女具是四法，則名丈夫。善男子，若有男子無此四法，則不得名為丈夫也。何以故？身雖丈夫，行同畜生。如來調伏若男若女，是故號佛為調御丈夫<sup>31</sup>。

<sup>28</sup> 大正藏：言如來者；永樂北藏及龍藏：如來者

<sup>29</sup> 大正藏：因調丈夫；永樂北藏及龍藏：因調丈夫故

<sup>30</sup> 大正藏：一，善知識；永樂北藏及龍藏：一，近善知識

<sup>31</sup> 大正藏：是故號佛調御丈夫；永樂北藏及龍藏：是故號佛為調御丈夫

「復次，善男子，如御馬者，凡有四種：一者，觸毛；二者，觸皮；三者，觸肉；四者，觸骨。隨其所觸，稱御者意。如來亦爾，以四種法調伏眾生：一，為說生便<sup>32</sup>受佛語，如觸其毛隨御者意；二，說生、老便受佛語，如觸毛、皮隨御者意；三者，說生及以老、病便受佛語，如觸毛、皮、肉隨御者意；四者，說生及老、病、死便受佛語，如觸毛、皮、肉、骨隨御者意。善男子，御者，調馬無有決定；如來世尊調伏眾生，必定不虛，是故號佛調御丈夫<sup>33</sup>。

「云何天人師？師有二種：一者，善教；二者，惡教。諸佛菩薩常以善法教諸眾生。何等善法？謂身、口、意善。諸佛菩薩教諸眾生，作如是言：『善男子，汝當遠離身不善業。何以故？以身惡業是可遠離得解脫故，是故我以此法教汝。若此<sup>34</sup>惡業不可遠離得解脫者，終不教汝令遠離也。』若諸眾生，離惡業已墮三惡者，無有是處。以遠離故，成阿耨多羅三藐三菩提，得大涅槃。是故，諸佛菩薩常以此法教化眾生。口、意亦爾。是故，號佛為無上師。

<sup>32</sup> 大正藏：令

<sup>33</sup> 大正藏：是故號佛為調御丈夫；永樂北藏及龍藏：是故號佛調御丈夫

<sup>34</sup> 大正藏：是

「復次，昔未得道，今已得之，以所得道，為眾生說；從本已來，未修梵行，今已修竟，以己所修，為眾生說；自破無明，復為眾生破壞無明；自得淨目，復為眾生破除盲瞶<sup>35</sup>，令得淨眼；自知二諦，復為眾生演說二諦；既自解脫，復為眾生說解脫法；自度無邊生死大海<sup>36</sup>，復令眾生皆悉得度；自得無畏，復教眾生令無怖畏；自既涅槃，復為眾生演大涅槃。是故，號佛為無上師。

「天者名晝，天上晝長夜短，是故名天。又復，天者，名無愁惱，常受快樂，是故名天。又復，天者，名為燈明，能破黑闇而為大明，是故名天。亦以能破惡業黑闇，得於<sup>37</sup>善業而生天上，是故名天。又復，天者名吉，以吉祥故，得名為天。又復，天者名日，日有光明，故名日為天。以是義故，名為天也。人者名為<sup>38</sup>，能多恩義。又復，人者，身、口柔軟。又復，人者，名有憍慢。又復，人者，能破憍慢。善男子，諸佛雖為一切眾生無上大師，而<sup>39</sup>經中說為天人師。何以故？善男子，諸眾生中，唯天與人能發阿耨多羅

<sup>35</sup> 大正藏：冥

<sup>36</sup> 大正藏：自渡無邊生死大河；永樂北藏及龍藏：自度無邊生死大海

<sup>37</sup> 大正藏：諸

<sup>38</sup> 大正藏：日

<sup>39</sup> 大正藏：然

三藐三菩提心，能修十善業道，能得須陀洹果、斯陀含果、阿那含果、阿羅漢果、辟支佛道，得阿耨多羅三藐三菩提，是故號佛為天人師。

「云何為佛？佛者名覺，既自覺悟，復能覺他。善男子，譬如有人，覺知有賊，賊無能為。菩薩摩訶薩能覺一切無量煩惱，既覺了已，令諸煩惱無所能為，是故名佛。以是覺故，不生、不老、不病、不死，是故名佛。

「婆伽婆者，婆伽名破，婆名煩惱。能破煩惱，故名婆伽婆。又能成就諸善法故，又能善解諸法義故，有大功德無能勝故，有大名聞遍十方故，又能種種大惠<sup>40</sup>施故，又於無量阿僧祇劫吐女根故。

「善男子，若男若女能如是念佛者，若行、若住、若坐、若卧，若晝、若夜，若明、若闇，常得不離，見佛世尊。

「善男子，何故名為如來、應、正遍知乃至婆伽婆，而有如是無量功德大名稱耶？善男子，菩薩<sup>41</sup>於昔無量阿僧祇劫恭敬父母、和尚、諸師、上座長老，於無量劫常為眾生而行布施，堅持禁

<sup>40</sup> 大正藏：慧

<sup>41</sup> 大正藏：菩薩摩訶薩；永樂北藏及龍藏：菩薩

戒，修習忍辱，勤行精進、禪定、智慧，大慈、大悲、大喜、大捨，是故今得三十二相、八十種好金剛之身。

「又復，菩薩於昔無量阿僧祇劫，修習信、進、念<sup>42</sup>、定、慧根，於諸師長恭敬供養，常為法利，不為食利。菩薩若持十二部經，若讀若誦，常為眾生令得解脫、安隱、快樂，終不自為。何以故？菩薩常修出世間心及出家心、無為之心、無諍訟心、無垢穢心、無繫縛心、無取著心、無覆蓋心、無無記心、無生死心、無疑網心、無貪欲心、無瞋恚心、無愚癡心、無憍慢心、無穢濁心、無煩惱心、無苦心、無量心、廣大心、虛空心、無心、無無心、不調心<sup>43</sup>、不護心、無覆藏心、無世間心、常定心、常修心、常解脫心、無報心、無願心、善願心、無語<sup>44</sup>心、柔軟心、不住心、自在心、無漏心、第一義心、不退心、無常心、正直心、無諂曲心、淳<sup>45</sup>善心、無多少心、無堅心、無凡夫心、無聲聞心、無緣覺心、善知心、界知心、生界知心、住界知心、自在界心，是故今得十力、四無所畏、大悲、三念處、常、

<sup>42</sup> 大正藏：念、進；永樂北藏及龍藏：進、念

<sup>43</sup> 大正藏：調心；永樂北藏及龍藏：不調心

<sup>44</sup> 大正藏：誤

<sup>45</sup> 大正藏：純

樂、我、淨，是故得稱如來乃至婆伽婆。是名菩薩摩訶薩念佛。

「云何菩薩摩訶薩念法？善男子，菩薩摩訶薩思惟諸佛所可說法最妙最上，因是法故，能令眾生得現在果。唯此正法無有時節，法眼所見，非肉眼見，然不可以譬喻為比，不生不出，不住不滅，不始不終，無為無數，無舍者為作舍<sup>46</sup>，無歸作歸，無明作明，未至彼岸令至彼岸<sup>47</sup>，為無香處作無礙香，不可覩見<sup>48</sup>，不動不轉，不長不短，永斷諸樂而安隱樂畢竟微妙，非色斷色而亦是色，乃至非識斷識而亦是識，非業斷業，非結斷結，非物斷物而亦是物，非界斷界而亦是界，非有斷有而亦是有，非入斷入而亦是入，非因斷因而亦是因，非果斷果而亦是果，非虛非實斷一切實而亦是實，非生非滅永斷生滅而亦是滅，非相非非相斷一切相而亦是相，非教非不教而亦是師，非怖非安斷一切怖而亦是安，非忍非不忍永斷不忍而亦是忍，非止非不止斷一切止而亦是止，一切法頂，悉能永斷一切煩惱，清淨無相，永脫諸相，無量眾生畢竟住處，能滅一切生死熾火，

<sup>46</sup> 大正藏：無舍宅者為作舍宅；永樂北藏及龍藏：無舍者為作舍

<sup>47</sup> 大正藏：未到彼岸令到彼岸；永樂北藏及龍藏：未至彼岸令至彼岸

<sup>48</sup> 大正藏：不可見見；永樂北藏及龍藏：不可覩見

乃是諸佛所遊居處，常不變易。是名菩薩念法。

「云何念僧？諸佛聖僧如法而住，受正直法，隨順修行，不可覩見，不可捉持，不可破壞，無能燒害，不可思議，一切眾生良祐福田。雖為福田，無所受取。清淨無穢，無漏無為，廣普無邊，其心調柔，平等無二，無有擾<sup>49</sup>濁，常不變易。是名念僧。

「云何念戒？菩薩思惟：『有戒，不破不漏，不壞不雜。雖無形色而可護持，雖無觸對善修方便，可得具足無有過咎，諸佛菩薩之所讚歎，是大方等大涅槃因。』善男子，譬如大地、船舫、瓔珞、大姓、大海<sup>50</sup>、灰汁、舍宅、刀劍、橋梁、良醫妙藥、阿伽陀藥、如意寶珠、脚足、眼目、父母、陰涼，無能劫盜，不可燒害，火不能焚，水不能漂。大山梯蹬，諸佛菩薩妙寶勝幢。若住是戒，得須陀洹果，我亦有分，然我不須。何以故？若我得是須陀洹果，不能廣度一切眾生。若住是戒，得<sup>51</sup>阿耨多羅三藐三菩提，我亦有分，是我所欲。何以故？若得阿耨多羅三藐三菩提，當為眾生廣說妙法而作救護。是名菩薩摩訶薩念

<sup>49</sup> 大正藏：燒

<sup>50</sup> 大正藏：大海；永樂北藏及龍藏：大姓、大海

<sup>51</sup> 大正藏：若住是戒則得；永樂北藏及龍藏：若住是戒得



戒。

「云何念施？菩薩摩訶薩深觀此施乃是阿耨多羅三藐三菩提因。諸佛菩薩親近修習如是布施，我亦如是親近修習。若不惠施，不能莊嚴四部之眾。施雖不能畢竟斷結而能除破現在煩惱。以施因緣<sup>52</sup>，常為十方無量無邊恒河沙等世界眾生之所稱歎。菩薩摩訶薩施眾生食則施其命，以是果報，得<sup>53</sup>佛之時，常不變易。以施樂故，成佛之時，則得安樂。菩薩施時，如法求財，不侵彼施此<sup>54</sup>，是故成佛得清淨涅槃。菩薩施時，令諸眾生，不求而得，是故成佛得自在。我以施因緣，令他得力，是故成佛獲得十力。以施因緣，令他得語，是故成佛得四無閼<sup>55</sup>。諸佛菩薩修習<sup>56</sup>是施為涅槃因，我亦如是修習布施為涅槃因，廣說如雜華中。

「云何念天？有四天王處乃至非想非非想處。若有信心得四天王處，我亦有分。若我<sup>57</sup>多聞、布施、智慧，得四天王處乃至得非想非非想處，我亦有分，然非我欲。何以故？四天王處乃

<sup>52</sup> 大正藏：以施因緣故；永樂北藏及龍藏：以施因緣

<sup>53</sup> 大正藏：成

<sup>54</sup> 大正藏：不侵彼施；永樂北藏及龍藏：不侵彼施此

<sup>55</sup> 大正藏：礙

<sup>56</sup> 大正藏：集

<sup>57</sup> 大正藏：戒

至非想非非想處皆是無常。以無常故，生、老、病、死。以是義故，非我所欲。譬如幻化，誑於愚夫，智慧之人，所不惑著。如幻化者，即是四天王處乃至非想非非想處，愚者即是一切凡夫，我則不同凡夫愚人。我曾聞有第一義天，謂諸佛菩薩常不變易。以常住故，不生、不老、不病、不死。我為眾生精勤志求<sup>58</sup>第一義天，何以故？第一義天能令眾生除斷煩惱，猶如意樹。若我有信乃至有慧，則能得是第一義天，當為眾生廣分別說第一義天。是名菩薩摩訶薩念天。

「善男子，是名菩薩，非世間也。是為世間不知、見、覺，而是菩薩所知、見、覺。

「善男子，若我弟子謂受持、讀誦、書寫、演說十二部經及以受持、讀誦、書寫、敷演、解說大涅槃經等無差別者，是義不然。何以故？善男子，大涅槃者，即是一切諸佛世尊甚深祕藏，以是諸佛甚深祕藏是則為勝。善男子，以是義故，大涅槃經甚奇甚特，不可思議。」

迦葉菩薩白佛言：「世尊！我亦知是大涅槃經甚奇甚特，不可思議；佛、法、眾僧不可思議；

<sup>58</sup> 大正藏：求於；永樂北藏及龍藏：志求

菩薩、菩提、大般涅槃<sup>59</sup>亦不可思議。世尊！以何義故，復言菩薩不可思議？」

「善男子，菩薩摩訶薩無有教者，而能自發菩提之心；既發心已，勤修精進，正使大火焚燒身首，終不求救，捨念法心。何以故？菩薩摩訶薩常自思惟：『我於無量阿僧祇劫，或在地獄、餓鬼、畜生、人中、天上，為諸結火之所燒然，初未<sup>60</sup>曾得一決定法，決定法者，即是阿耨多羅三藐三菩提。我為阿耨多羅三藐三菩提，終不護惜身、心與命。我為阿耨多羅三藐三菩提，正使碎身猶如微塵，終不放捨勤精進也。何以故？勤精進心<sup>61</sup>即是阿耨多羅三藐三菩提因。』

「善男子，如是，菩薩未見阿耨多羅三藐三菩提，乃能如是不惜身命，況復見已？是故，菩薩不可思議。

「又復，不可思議，菩薩摩訶薩所見生死無量過患非是聲聞、緣覺所及。雖知生死無量過患<sup>62</sup>，為眾生故，於中受苦，不生厭離。是故，復名不可思議。

「菩薩摩訶薩為眾生故，雖在地獄受諸苦惱，

<sup>59</sup> 大正藏：大涅槃經；永樂北藏及龍藏：大般涅槃

<sup>60</sup> 大正藏：不

<sup>61</sup> 大正藏：勤進之心；永樂北藏及龍藏：勤精進心

<sup>62</sup> 大正藏：惡

如三禪樂，是故復名不可思議。

「善男子，譬如長者，其家失火，長者見已，從舍而出，諸子在後，未脫火難。長者爾時，定知火害，為諸子故，旋還赴救，不顧其難。菩薩摩訶薩亦復如是，雖知生死多諸過惡，為眾生故，處之不厭，是故復名不可思議。

「善男子，無量眾生發菩提心，見生死中多諸過惡，心即退沒，或為聲聞，或為緣覺。若有菩薩聞是經者，終不退失菩提之心，而為聲聞、辟支佛也。如是菩薩，雖復未階初不動地，而心堅固，無有退沒，是故復名不可思議。

「善男子，若有唱言<sup>63</sup>：『我能浮度<sup>64</sup>大海之水。』如是之言，可思議不？」

「世尊！如是之言，或可思議，或不可思議。何以故？若人度者，則不可思議；阿脩羅渡，則可思議。」

「善男子，我亦不說阿脩羅也，正說人耳。」

「世尊！人中亦有可思議者、不可思議者。世尊！人有<sup>65</sup>二種：一者，聖人；二者，凡夫。凡夫之人，則不可思議；賢聖之人，則可思議。」

<sup>63</sup> 大正藏：若有人言；永樂北藏及龍藏：若有唱言

<sup>64</sup> 大正藏：渡（後同）

<sup>65</sup> 大正藏：亦

「善男子，我說凡夫，不說聖人。」

「世尊！若凡夫人實不可思議。」

「善男子，凡夫之人，實不能度大海水也。而<sup>66</sup>是菩薩實能度彼<sup>67</sup>生死大海，是故復名不可思議。」

「善男子，若有人能以藕根絲懸須彌山，可思議不？」

「不也。世尊！」

「善男子，菩薩摩訶薩於一念頃，悉能稱量一切生死，是故復名不可思議。」

「善男子，菩薩摩訶薩已於無量阿僧祇劫，常觀生死無常、無我、無樂、無淨，而為眾生分別演說常、樂、我、淨，雖如是說，然非邪見，是故復名不可思議。」

「善男子，如人入水水不能溺，入大猛火火不能燒，如是之事不可思議。菩薩摩訶薩亦復如是，雖處生死不為生死之所惱害，是故復名不可思議。」

「善男子，人有三品，謂上、中、下。下品之人初入胎時，作是念言：『我今處廁，眾穢歸

<sup>66</sup> 大正藏：如

<sup>67</sup> 大正藏：於

處、諸<sup>68</sup>死屍間、棘刺叢林、大黑闇中<sup>69</sup>。』初出胎時，復作是念：『我今出廁，諸穢惡處<sup>70</sup>，乃至出於大黑闇中<sup>71</sup>。』中品之人作是念言：『我今入於眾樹林果<sup>72</sup>、清淨河中、房室舍宅。』出時，亦爾。上品之人作是念言：『我昇殿堂，在華林間，乘馬乘象，登上<sup>73</sup>高山。』出時，亦爾。菩薩摩訶薩初入胎時，自知入胎，住時知住，出時知出，不起貪欲瞋恚之心<sup>74</sup>，而亦未得初住之地<sup>75</sup>，是故復名不可思議。

「善男子，阿耨多羅三藐三菩提實不可以譬喻為比。善男子，心亦不可以方喻為比而皆可說。菩薩摩訶薩無有師咨受學之處，而能得是<sup>76</sup>阿耨多羅三藐三菩提。得是法已，心無慳吝，常為眾生而演說之。是故，得<sup>77</sup>名不可思議。

「善男子，菩薩摩訶薩有身遠離非口，有口遠離非身，有非身、口而亦遠離。身遠離者，謂離殺、盜、婬，是名身遠離非口。口遠離者，謂

<sup>68</sup> 大正藏：如

<sup>69</sup> 大正藏：眾棘刺中、大黑闇處；永樂北藏及龍藏：棘刺叢林、大黑闇中

<sup>70</sup> 大正藏：出眾穢處；永樂北藏及龍藏：諸穢惡處

<sup>71</sup> 大正藏：處

<sup>72</sup> 大正藏：中

<sup>73</sup> 大正藏：陟

<sup>74</sup> 大正藏：終不生於貪瞋之心；永樂北藏及龍藏：不起貪欲瞋恚之心

<sup>75</sup> 大正藏：而未得階初住地也；永樂北藏及龍藏：而亦未得初住之地

<sup>76</sup> 大正藏：於

<sup>77</sup> 大正藏：復

離妄語、兩舌、惡口、無義語，是名口遠離非身。非身非口亦<sup>78</sup>遠離者，所謂遠離貪嫉<sup>79</sup>、瞋恚、邪見。善男子，是名非身非口而是遠離。善男子，菩薩摩訶薩不見一法是身、是業及與離主而亦有離，是故復名不可思議。口亦如是。

「善男子，從身離身，從口離口，從慧遠離非身非口。善男子，實有此慧，然不能令菩薩遠離。何以故？善男子，無有一法能壞能作，有為法性異生異滅，是故此慧不能遠離。

「善男子，慧不能破，火不能燒，水不能爛，風不能動，地不能持，生不能生，老不能老，住不能住，壞不能壞，貪不能貪，瞋不能瞋，癡不能癡，以有為性異生異滅故。菩薩摩訶薩終不生念：『我以此慧破諸煩惱。』而自說言：『我破煩惱。』雖作是說非是虛妄，是故復名不可思議。」

迦葉菩薩白佛言<sup>80</sup>：「世尊！我今始知菩薩摩訶薩不可思議，佛、法、眾僧、大涅槃經及受持者、菩提、涅槃不可思議。世尊！無上佛法住當久近<sup>81</sup>？幾時而滅？」

「善男子，若大涅槃經乃至有是五行，所謂

<sup>78</sup> 大正藏：欲

<sup>79</sup> 大正藏：欲

<sup>80</sup> 大正藏：迦葉復言；永樂北藏及龍藏：迦葉菩薩白佛言

<sup>81</sup> 大正藏：當久近住；永樂北藏及龍藏：住當久近

聖行、梵行、天行、病行、嬰兒行。若我弟子有能受持、讀誦、書寫、演說其義，為諸眾生之所恭敬、尊重、讚歎、種種供養，當知爾時，佛法未滅。

「善男子，若大涅槃經具足流布，當爾之時，我諸弟子多犯禁戒，造作眾惡，不能敬信如是經典，以不信故，不能受持、讀誦、書寫、解說其義，不為眾人之所恭敬乃至供養，見受持者輕毀誹謗：『汝是六師，非佛弟子。』當知佛法將滅不久。」

迦葉菩薩復白佛言：「世尊！我親從佛受<sup>82</sup>如是義：『迦葉佛法，住世七日，然後滅盡。』世尊！迦葉如來有是經不？若<sup>83</sup>其有者，云何言滅？若<sup>84</sup>其無者，云何說言大涅槃經是諸如來祕密之藏？」

佛言：「善男子，我上<sup>85</sup>說言，唯有文殊乃解是義，今當重說，至心諦聽。善男子，諸佛世尊有二種法：一者，世法；二者，第一義法。世法可滅，第一義法則不壞滅。

「復有二種：一者，無常、無我、無樂、無淨；二者，常、樂、我、淨。無常、無我、無樂、

<sup>82</sup> 大正藏：聞

<sup>83</sup> 大正藏：如

<sup>84</sup> 大正藏：如

<sup>85</sup> 大正藏：先



無淨則有壞滅，常、樂、我、淨則無壞滅。

「復有二種：一者，二乘所持；二者，菩薩所持。二乘所持則有壞滅，菩薩所持則無壞滅。

「復有二種：一者，外；二者，內。外法<sup>86</sup>則有壞滅，內法者則無壞滅。

「復有二種：一者，有為；二者，無為。有為之法則有壞滅，無為之法無有壞滅。

「復有二種：一者，可得；二<sup>87</sup>，不可得。可得之法則有壞滅，不可得法<sup>88</sup>無有壞滅。

「復有二種：一者，共法；二者，不共。共法壞滅，不共之法無有壞滅。

「復有二種：一者，人中；二者，天中。人中壞滅，天無壞滅。

「復有二種：一者，十一部經；二者，方等經。十一部經則有壞滅，方等經典無有壞滅。

「善男子，若我弟子受持、讀誦、書寫、解說方等經典，恭敬供養，尊重讚歎，當知爾時，佛法不滅。

「善男子，汝向所問『迦葉如來有是經不？』者，善男子，大涅槃經悉是一切諸佛祕藏。何以

<sup>86</sup> 大正藏：外法者；永樂北藏及龍藏：外法

<sup>87</sup> 大正藏：二者；永樂北藏及龍藏：二

<sup>88</sup> 大正藏：者

故？諸佛雖有十一部經，不說佛性，不說如來常、樂、我、淨，諸佛世尊不畢竟涅槃<sup>89</sup>，是故此經名為如來祕密之藏。十一部經所不說故，故名為藏。如人七寶，不出外用，名之為藏。善男子，是人所以藏積此物，為未來事故。何等未來事？所謂穀貴、賊來侵國、值遇惡王、為用贖命、道路澀<sup>90</sup>難、財難得時，乃當出用。善男子，諸佛如來祕密之藏亦復如是，為未來世諸惡比丘，畜不淨物，為四眾說如來畢竟入於涅槃，讀誦世典，不敬佛經，如是等惡現於世時，如來為欲滅是諸惡，令得遠離邪命利養，如來則為演說是經。若是經典祕密之藏滅不現時，當知爾時，佛法則滅。

「善男子，大涅槃經常不變易，云何難言：『迦葉佛時，有是經不？』善男子，迦葉佛時，所有眾生，貪欲微薄，智慧滋多，諸菩薩摩訶薩等調柔易化，有大威德，總持不忘，如大象王，世界清淨，一切眾生悉知如來終不畢竟入於涅槃，常住不變，雖有是典，不須演說。善男子，今世眾生，多諸煩惱，愚癡憙忘，無有智慧，多諸疑網，信根不立，世界不淨，一切眾生咸謂：『如

<sup>89</sup> 大正藏：永不畢竟入於涅槃；永樂北藏及龍藏：不畢竟涅槃

<sup>90</sup> 大正藏：急

來無常遷變，畢竟入於大般涅槃。』是故，如來演說是典。

「善男子，迦葉佛法實亦不滅。何以故？常不變故。

「善男子，若有眾生，我見無我、無我見我，常見無常、無常見常，樂見無樂、無樂見樂，淨見不淨、不淨見淨，不滅見滅，滅見不滅<sup>91</sup>，罪見非罪、非罪見罪，輕罪見重、重罪見輕，乘見非乘、非乘見乘，道見非道、非道見道，實是菩提見非菩提、實非菩提見是菩提<sup>92</sup>，苦見非苦、集見非集、滅見非滅、實見非實，實是世諦見第一義諦、第一義諦見是世諦，歸見非歸、非歸見歸，以真佛語名為魔語、實是魔語以為佛語，如是之時，諸佛乃說大涅槃經。

「善男子，寧說蟲觜盡大海底，不可說言如來法滅；寧言以索繫縛猛風，不可說言如來法滅<sup>93</sup>；寧說口吹須彌散壞，不可說言如來法滅；寧言以索繫縛猛風，不可說言如來法滅<sup>94</sup>；寧言佉陀羅火中生蓮華，不可說言如來法滅；寧說阿伽陀藥而為毒藥，不可說言如來法滅；寧說月可令

<sup>91</sup> 大正藏：滅見不滅，不滅見滅；永樂北藏及龍藏：不滅見滅，滅見不滅

<sup>92</sup> 大正藏：謬見菩提；永樂北藏及龍藏：見是菩提

<sup>93</sup> 大正藏：（無）；永樂北藏及龍藏：寧言以索繫縛猛風，不可說言如來法滅

<sup>94</sup> 大正藏：寧言以索繫縛猛風，不可說言如來法滅；永樂北藏及龍藏：（無）

熱，日可令冷，不可說言如來法滅；寧說四大各捨己性，不可說言如來法滅。

「善男子，若佛初出得阿耨多羅三藐三菩提已，未有弟子解甚深義，而<sup>95</sup>佛世尊便涅槃者，當知是法不久住世。

「復次，善男子，若佛初出得阿耨多羅三藐三菩提已，有諸弟子解甚深義，佛雖涅槃，當知是法久住於世。

「復次，善男子，若佛得阿耨多羅三藐三菩提<sup>96</sup>，雖有弟子解甚深義，無有篤信白衣檀越敬重佛法，佛便涅槃，當知是法不久住世。

「復次，善男子，若佛初出得阿耨多羅三藐三菩提已，有諸弟子解甚深義，多有篤信白衣檀越敬重佛法，佛雖涅槃，當知佛法久住於世。

「復次，善男子，若佛初出得阿耨多羅三藐三菩提已，有諸弟子解甚深義，雖有篤信白衣檀越敬重佛法，而諸弟子演說經法，貪為利養，不為涅槃，佛復滅度，當知是法不久住世。

「復次，善男子，若佛初出得阿耨多羅三藐三菩提已，有諸弟子解甚深義，復有篤信白衣檀

<sup>95</sup> 大正藏：彼

<sup>96</sup> 大正藏：三藐三菩提已；永樂北藏及龍藏：三藐三菩提

越敬重佛法，彼諸弟子凡所演說，不貪利養，為求涅槃，佛雖滅度，當知是法久住於世。

「復次，善男子，若佛初出得阿耨多羅三藐三菩提已，雖有弟子解甚深義，復有篤信白衣檀越敬重佛法，而諸弟子多起諍訟，互相是非，佛復涅槃，當知是法不久住世。

「復次，善男子，若佛初出得阿耨多羅三藐三菩提已，有諸弟子解甚深義，復有篤信白衣檀越敬重佛法，彼諸弟子修和敬法，不相是非，互相尊重，佛雖涅槃，當知是法久住不滅。

「復次，善男子，若佛初出得阿耨多羅三藐三菩提已，雖有弟子解甚深義，復有篤信白衣檀越敬重佛法，彼諸弟子為大涅槃而演說法，互相恭敬，不起諍訟，然畜一切不淨之物，復自讚言：『我得須陀洹果乃至阿羅漢果。』佛復涅槃，當知是法不久住世。

「復次，善男子，若佛初出得阿耨多羅三藐三菩提已，有諸弟子解甚深義，復有篤信白衣檀越敬重佛法，彼諸弟子為大涅槃演說經法，善修和敬，互相尊重，不畜一切不淨之物，亦不自言得須陀洹乃至得阿羅漢，彼佛世尊雖復滅度，當知是法久住於世。

「復次，善男子，若佛初出得阿耨多羅三藐三菩提已，有諸弟子乃至不畜不淨之物，又不自言得須陀洹乃至<sup>97</sup>阿羅漢，各執所見，種種異說，而作是言：『長老，諸佛所制四重之法乃至七滅諍法，為眾生故，或遮或開；十二部經亦復如是。何以故？佛知國土時節各異、眾生不同、利鈍差別，是故，如來或遮或開，有輕重說。善男子，譬如良醫，為病服乳，為病遮乳，熱病聽服，冷病則遮。如來亦爾，觀諸眾生煩惱病根，亦開亦遮。長老，我親從佛聞如是義，唯我知義，汝不能知；唯我解律，汝不能解；我知諸經，汝不能知。』彼佛復滅，當知是法不久住世。

「善男子<sup>98</sup>，若佛得阿耨多羅三藐三菩提已，有諸弟子乃至不言：『我得須陀洹果至阿羅漢果<sup>99</sup>。』亦不說言：『諸佛世尊為眾生故，或遮或開。長老，我親從佛聞如是義、如是法、如是律。長老，當依如來十二部經。此義若是，我當受持；若<sup>100</sup>其非者，我當棄捨。』彼佛世尊雖復涅槃，當知是法久住於世。

「善男子，我法滅時，有聲聞弟子或說有神，

<sup>97</sup> 大正藏：至；永樂北藏及龍藏：乃至

<sup>98</sup> 大正藏：復次，善男子；永樂北藏及龍藏：善男子

<sup>99</sup> 大正藏：阿羅漢；永樂北藏及龍藏：阿羅漢果

<sup>100</sup> 大正藏：如

或說神空；或說有中陰，或說無中陰；或說有三世，或說無三世；或說有三乘，或說無三乘；或言一切有，或言一切無；或言眾生有始有終，或言眾生無始無終；或言十二因緣是有為法，或言因緣是無為法；或言如來有病苦行，或言如來無病苦行。或言如來不聽比丘食十種肉，何等為十？人、蛇、象、馬、驢、狗、師子、猪、狐、獼猴，其餘悉聽，或言一切不聽；或言比丘不作五事，何等為五？不賣生口、刀、酒、洛<sup>101</sup>沙、胡麻油<sup>102</sup>，其餘悉聽；或言不聽入五種家<sup>103</sup>，何等為五？屠兒、婬女、酒家、王宮、旃陀羅舍，餘家<sup>104</sup>悉聽；或言不聽憍舍<sup>105</sup>耶衣，餘一切聽；或言如來聽諸比丘畜<sup>106</sup>衣、食、卧具，其價各直十萬兩金，或言不聽；或言涅槃常、樂、我、淨，或言涅槃直是結盡，更無別法，名為涅槃，譬如織縷名之為衣，衣既壞已，名為<sup>107</sup>無衣，實無別法名無衣也，涅槃之體亦復如是。

「善男子，當爾之時，我諸弟子，正說者少，

<sup>101</sup> 大正藏：酪

<sup>102</sup> 大正藏：胡麻油等；永樂北藏及龍藏：胡麻油

<sup>103</sup> 大正藏：舍

<sup>104</sup> 大正藏：舍

<sup>105</sup> 大正藏：奢

<sup>106</sup> 大正藏：受畜；永樂北藏及龍藏：畜

<sup>107</sup> 大正藏：之

邪說者多；受正法少，受邪法多；受佛語少，受魔語多。

「善男子，爾時，拘睺彌國有二弟子：一，阿羅漢<sup>108</sup>；二者，破戒。破戒徒眾凡有五百，羅漢徒眾其數一百。破戒者說：『如來畢竟入於涅槃，我親從佛聞如是義，如來所制四重之法，若持亦可，犯亦無罪。我今亦得阿羅漢果、四無闕智，而阿羅漢亦犯如是四重之法。四重之法若是實罪，阿羅漢者終不應犯。如來在世制言堅持，臨涅槃時，皆悉放捨。』

「阿羅漢比丘言<sup>109</sup>：『長老，汝不應說如來畢竟入於涅槃，我知如來常不變易，如來在世及涅槃後，犯四重禁罪無差別。若言羅漢犯四重禁，是義不然。何以故？須陀洹人尚不犯禁，況阿羅漢？若長老言：「我是羅漢。」阿羅漢者終不生想：「我得羅漢。」阿羅漢者，唯說善法，不說不善。長老所說皆<sup>110</sup>是非法，若有得見十二部經，定知長老非阿羅漢。』

「善男子，爾時，破戒比丘徒眾即共斷是阿羅漢命。善男子，是時，魔王因是二眾忿恚之心，

<sup>108</sup> 大正藏：一者，羅漢；永樂北藏及龍藏：一，阿羅漢

<sup>109</sup> 大正藏：時，阿羅漢比丘言；永樂北藏及龍藏：阿羅漢比丘言

<sup>110</sup> 大正藏：純



悉共害是六百比丘。爾時，凡夫各共說言：『哀哉，佛法於是滅盡。』而我正法實不滅也。爾時，其國有十二萬諸大菩薩善持我法，云何當言我法滅耶？

「當於<sup>111</sup>爾時，閻浮提內無一比丘為我弟子。爾時，波旬悉以大火焚燒一切所有經典，其中或有遺餘在者，諸婆羅門即共偷取，處處采<sup>112</sup>拾，安置己典。以是義故，諸小菩薩佛未出時，率共信受婆羅門語，諸婆羅門雖作是說：『我有齋戒。』而諸外道真實無也。諸外道等雖復說言有樂、我<sup>113</sup>、淨，而實不解我、樂、淨義，直以佛法一字二字、一句二句說言：『我典有如是義。』」

爾時，拘尸城<sup>114</sup>娑羅雙樹間，無量無邊阿僧祇眾聞是語已，悉共唱言：「世間虛空，世間虛空。」

迦葉菩薩告諸大眾：「汝等且莫憂悲<sup>115</sup>啼哭。世間不空，如來常住，無有變易，法、僧亦爾。」

爾時，大眾聞是語已，啼哭即止，悉發阿耨多羅三藐三菩提心。

<sup>111</sup> 大正藏：于

<sup>112</sup> 大正藏：採

<sup>113</sup> 大正藏：我、樂；永樂北藏及龍藏：樂、我

<sup>114</sup> 大正藏：拘尸那城；永樂北藏及龍藏：拘尸城

<sup>115</sup> 大正藏：愁

大般涅槃經卷第十六

# 大般涅槃經卷第十七

北涼天竺三藏曇無讖譯 梵

宋沙門慧嚴慧觀同謝靈運再治

## 梵行品第二十之四<sup>116</sup>

爾時，王舍大城阿闍世王，其性慳<sup>117</sup>惡，喜行殺戮，具口四過<sup>118</sup>，貪恚愚癡。其心熾盛，唯見現在，不見未來，純以惡人而為眷屬，貪著現世五欲樂故，父王無辜，橫加逆害。因害父已，心生悔熱，身諸<sup>119</sup>瓔珞，妓<sup>120</sup>樂不御。心悔熱故，遍體生瘡，其瘡臭穢，不可附近。尋自念言：「我今此身已受華報，地獄果報將近不遠。」爾時，其母，韋提希后<sup>121</sup>，以種種藥而為塗之，其瘡遂增，無有降損。王即白母：「如是瘡者，從心而生，非四大起。若言眾生有能治者，無有是處。」

時有大臣，名曰月稱，往至王所，在一面立，白言：「大王！何故愁悴顏容不悅？為身痛耶？為心痛乎？」

<sup>116</sup> 大正藏：梵行品之第四

<sup>117</sup> 大正藏：弊

<sup>118</sup> 大正藏：惡

<sup>119</sup> 大正藏：脫

<sup>120</sup> 大正藏：伎

<sup>121</sup> 大正藏：字韋提希；永樂北藏及龍藏：韋提希后

王答臣言：「我今身心豈得不痛？我父無辜，橫加逆害。我從智者曾聞是義：『世有五人不脫地獄，謂五逆罪。』我今已有無量無邊阿僧祇罪，云何身心而得不痛？又無良醫治我身心。」

臣言：「大王！莫大愁苦。」即說偈言：

若常愁苦 愁遂增長  
如人喜眠 眠則滋多  
貪淫<sup>122</sup>嗜酒 亦復如是

「如王所言：『世有五人不脫地獄。』誰往見之來語王耶？言地獄者，即<sup>123</sup>是世間多智者說。如王所言『世無良醫治身心』者，今有大醫名富蘭那，一切知見，得自在定，畢竟修習清淨梵行，常為無量無邊眾生演說無上涅槃之道。為諸弟子說如是法：『無有黑業，無黑業報；無有白業，無白業報；無黑白業，無黑白業報；無有上業及以下業。』是師今在王舍城中，唯願大王屈駕往彼，可令是師療治身心。」

時王答言：「審能如是滅除我罪，我當歸依。」

復有一臣，名曰藏德，復往王所而作是言：「大王！何故面貌憔悴，脣口乾燥<sup>124</sup>，音聲微細，

<sup>122</sup> 大正藏：婬

<sup>123</sup> 大正藏：直

<sup>124</sup> 大正藏：焦

猶如怯人見大怨敵顏色慘<sup>125</sup>變？將何所苦？為身痛耶？為心痛乎？」

王即答言：「我今身心云何不痛？我之癡盲，無有慧眼<sup>126</sup>，近諸惡友而為親善，隨提婆達惡人之言，正法之王橫加逆害。我昔曾聞智人說偈：

若於父母 佛及弟子  
生不善心 起於惡業  
如是果報 在阿鼻獄

「以是事故，令<sup>127</sup>我心怖，生大苦惱，無有<sup>128</sup>良醫而見救療。」

大臣復言：「唯願大王且莫愁怖。法有二種：一者，出家；二者，王法。王法者，謂害其父，則王國土，雖云是逆，實無有罪。如迦羅羅虫，要壞母腹，然後乃生；生法如是，雖破母身，實亦無罪。騾等懷妊<sup>129</sup>亦復如是。治國之法，法應如是，雖害<sup>130</sup>父兄，亦<sup>131</sup>無有罪。出家法者，乃至蟲、蟻，殺亦有罪。唯願大王寬意莫愁。何以故？

<sup>125</sup> 大正藏：慄

<sup>126</sup> 大正藏：目

<sup>127</sup> 大正藏：今

<sup>128</sup> 大正藏：又無；永樂北藏及龍藏：無有

<sup>129</sup> 大正藏：騾懷妊等；永樂北藏及龍藏：騾等懷妊

<sup>130</sup> 大正藏：殺

<sup>131</sup> 大正藏：實；永樂北藏及龍藏：亦

若常愁苦 愁遂增長  
如人喜眠 眠則滋多  
貪婬嗜酒 亦復如是

「如王所言『世無良醫治身心』者，今有大師，名末伽梨拘舍離子，一切知見，憐憫眾生猶如赤子，已離煩惱，能拔眾生三毒利箭。一切眾生於一切法無知、見、覺，唯是一人獨知、見、覺。如是大師常為弟子說如是法：『一切眾生身有七分。何等為七？地、水、火、風、苦、樂、壽命。如是七法非化非作，不可毀害。如伊師迦草，安住不動如須彌山，不捨不作猶如乳酪，各不諍訟，若苦若樂，若善不善，投之利刀無所傷害。何以故？七分空中無妨闔<sup>132</sup>故，命亦無害。何以故？無有害者及死者故，無作無受，無說無聽，無有念者及以教者。』常說是法，能令眾生滅除一切無量重罪。是師今在王舍大城，唯願大王往至其所。王若見者，眾罪消滅。」

時王答言：「審能如是除滅我罪，我當歸依。」

復有一臣，名曰實得，復到王所即說偈言：

大王何故 身脫瓔珞  
首髮蓬亂 乃至如是

<sup>132</sup> 大正藏：礙

王身何故 戰慄不安  
猶如猛風 吹動華樹

「王今何故容色愁悴？猶如農夫下種之後，天不降雨，愁苦如是。為是心痛？為身痛耶？」

王即答言：「我今身心豈得不痛？我父先王慈愛仁<sup>133</sup>惻，特見矜念，實無過<sup>134</sup>咎，往問相師，相師答言：『是兒生已，定當害父。』雖聞是語，猶見贍<sup>135</sup>養。曾聞智者作如是言：『若人通母、污<sup>136</sup>比丘尼、偷僧祇物、害<sup>137</sup>發無上菩提心人<sup>138</sup>及殺其父<sup>139</sup>，如是之人必<sup>140</sup>定當墮阿鼻地獄。』我今身心豈得不痛？」

大臣復言：「唯願大王且莫愁苦。如其父王，修解脫者，害則有罪；若治國法，殺則無罪。大王！非法者，名為無法；無法者，名為無罪<sup>141</sup>。譬如無子，名為無子；又如惡子，亦名無子<sup>142</sup>，雖言無子，實非無子。如食無鹽，名為無鹽；食若少鹽，亦名無鹽。如河無水，名為無水；若有

<sup>133</sup> 大正藏：流

<sup>134</sup> 大正藏：辜

<sup>135</sup> 大正藏：贍

<sup>136</sup> 大正藏：及

<sup>137</sup> 大正藏：殺

<sup>138</sup> 大正藏：者

<sup>139</sup> 大正藏：害及其父；永樂北藏及龍藏：及殺其父

<sup>140</sup> 大正藏：畢

<sup>141</sup> 大正藏：法

<sup>142</sup> 大正藏：亦如惡子，名之無子；永樂北藏及龍藏：又如惡子，亦名無子

少水，亦名無水。如念念滅，名曰<sup>143</sup>無常；雖住一劫，亦名無常。如人受苦，名為無樂；雖受少樂，亦名無樂。如不自在，名為<sup>144</sup>無我；雖少自在，亦名無我。如闇夜時，名為<sup>145</sup>無日；雲霧之時，亦言無日。大王！雖言少法名為無法，實非無法。願王留神聽臣所說，一切眾生皆有餘業，以業緣故，數受生死。若使先王有餘業者，王今害之<sup>146</sup>竟有何罪？唯願大王寬意莫愁。何以故？

若常愁苦 愁遂增長  
如人喜眠 眠則滋多  
貪婬嗜酒 亦復如是

「如王所言『世無良醫治身心』者，今有大師，名珊<sup>147</sup>闍耶毗羅胝子，一切知見，其智深廣<sup>148</sup>猶如大海，有大威德，具大神通，能令眾生離諸疑網。一切眾生不知、見、覺，唯是一人獨知、見、覺。今者近在王舍城住，為諸弟子說如是法：『一切眾中，若是王者，自在隨意造作善惡，雖為眾惡悉無有罪。如火燒物，無淨不淨；王亦如是，與火同性。譬如大地，淨穢普載，雖為是事，

<sup>143</sup> 大正藏：亦言；永樂北藏及龍藏：名曰

<sup>144</sup> 大正藏：之

<sup>145</sup> 大正藏：之

<sup>146</sup> 大正藏：今王殺之；永樂北藏及龍藏：王今害之

<sup>147</sup> 大正藏：刪

<sup>148</sup> 大正藏：淵深；永樂北藏及龍藏：深廣



初無瞋喜；王亦如是，與地同性。譬如水性，淨穢俱洗，雖為是事，亦無憂喜；王亦如是，與水同性。譬如風性，淨穢等吹，雖為是事，亦無憂喜；王亦如是，與風同性。如秋杙<sup>149</sup>樹，春則還生，雖復杙<sup>150</sup>斫，實無有罪。一切眾生亦復如是，此間命終，還生此間<sup>151</sup>。以還生故，當有何罪？一切眾生苦樂果報，悉皆不由現在世業，因在過去，現在受果；現在無因，未來無果。以現果故，眾生持戒，勤修精進，遮現惡果。以持戒故，則得無漏；得無漏故，盡有漏業；以盡業故，眾苦得盡；眾苦盡故，便<sup>152</sup>得解脫。』唯願大王速往其所，令其療治身心苦痛。王若見者，眾罪得<sup>153</sup>除。」

王即答言：「審有是師能除我罪，我當歸依。」

復有一臣，名悉知義，復<sup>154</sup>至王所作如是言：「王今何故形不端嚴？如失國者、如泉枯涸、池無蓮華、樹無枝<sup>155</sup>葉、破戒比丘身無威德。為身痛耶？為心痛乎？」

<sup>149</sup> 大正藏：髡

<sup>150</sup> 大正藏：髡

<sup>151</sup> 大正藏：還此間生；永樂北藏及龍藏：還生此間

<sup>152</sup> 大正藏：故

<sup>153</sup> 大正藏：除

<sup>154</sup> 大正藏：即

<sup>155</sup> 大正藏：華

王即答言：「今我<sup>156</sup>身心豈得無痛？我父先王慈惻流念，而<sup>157</sup>我不孝，不知報恩，常以安樂安樂於我，而我背恩，反斷其樂。先王無過<sup>158</sup>，橫興逆害。我亦曾聞智者說言：『若有害父，當於無量阿僧祇劫受大苦惱。』我今不久必墮地獄，又無良醫救療我罪。」

大臣即言：「唯願大王放捨愁苦。王不聞耶？昔者有王，名曰羅摩，害其父已，得紹王位。跋提大王、毗樓真王、那睺沙王、迦帝迦王、毗舍佉王、月光明王、日光明王、愛王、持多人王，如是等王皆害其父，得紹王位，然無一王入地獄者。於今現在，毗瑠璃王、優陀耶<sup>159</sup>王、惡性王、鼠王、蓮華王，如是等王皆害其父，悉無一王生愁惱者。雖言地獄、餓鬼、天中，誰有見者？大王！唯有二有：一者、人道，二者、畜生。雖有是二，非因緣生，非因緣死。若非因緣，何有善惡？唯願大王勿懷愁怖。何以故？

若常愁苦 愁遂增長

如人喜眠 眠則滋多

貪婬嗜酒 亦復如是

<sup>156</sup> 大正藏：我今；永樂北藏及龍藏：今我

<sup>157</sup> 大正藏：然

<sup>158</sup> 大正藏：辜

<sup>159</sup> 大正藏：那

「如王所言『世無良醫治身心』者，今有大師，名阿耨多翅舍欽婆羅，一切知見，觀金與土平等無二；刀斫右脅，栴檀塗左<sup>160</sup>，於此二人心無差別；等視怨親，心無異相。此師真是世之良醫，若行若立，若坐若卧，常在三昧，心無分散。告諸弟子作如是言：『若自作，若教他作；若自斫，若教他斫；若自灸，若教他灸；若自害、若教他害；若自偷、若教他偷；若自婬、若教他婬；若自妄語、若教他妄語；若自飲酒、若教他飲酒；若殺一村、一城、一國，若以刀輪殺一切眾生；若恒河以<sup>161</sup>南布施眾生，恒河以<sup>162</sup>北殺害眾生，悉無罪福，無施、戒、定。』今者近在王舍城住，願王速往。王若見者，眾罪除滅。」

王語大臣<sup>163</sup>：「審能如是除滅我罪，我當歸依。」

復有大臣，名曰吉德，復往王所，作如是言：「王今何故面無光澤？如日中燈、如晝時月、如失國君、如荒敗土。大王！今者四方清夷，無諸怨敵，而今何故如是愁苦？為身苦耶？為心苦乎？有諸王子常生此念：『我今何時當得自在？』大

<sup>160</sup> 大正藏：左塗栴檀；永樂北藏及龍藏：栴檀塗左

<sup>161</sup> 大正藏：已

<sup>162</sup> 大正藏：已

<sup>163</sup> 大正藏：王言：「大臣；永樂北藏及龍藏：王語大臣

王！今者已果所願，自在王領摩伽陀國，先王寶藏具足而得，唯當快意縱情受樂，如是愁苦何用經懷？」

王即答言：「我今云何得不愁惱？譬如愚人<sup>164</sup>，但貪其味，不見利刀；如食雜毒，不見其過；我亦如是。如鹿見草，不見深窞；如鼠貪食，不見猫狸；我亦如是，見現在樂，不見未來不善苦果。曾從智者聞如是言：『寧於一日受三百矛<sup>165</sup>，不於父母生一念惡。』我今已近地獄熾火，云何當得不愁惱耶？」

大臣復言：「誰來誑王言有地獄？如刺頭尖<sup>166</sup>，誰之所造？飛鳥異色<sup>167</sup>，復誰所作？水性潤澤<sup>168</sup>、石性堅硬、如風動性、如火熱性，一切萬物自死自生，誰之所作？言地獄者，直是智者文詞<sup>169</sup>造作。言地獄者，為有何義？臣當說之。地者名地，獄者名破，破於地獄無有罪報，是名地獄。又復，地者名人，獄者名天，以其害父<sup>170</sup>，故到人天。以是義故，婆藪仙人唱言：『殺羊得

<sup>164</sup> 大正藏：大臣，譬如愚人；永樂北藏及龍藏：譬如愚人

<sup>165</sup> 大正藏：穢

<sup>166</sup> 大正藏：利

<sup>167</sup> 大正藏：色異；永樂北藏及龍藏：異色

<sup>168</sup> 大正藏：漬

<sup>169</sup> 大正藏：辭

<sup>170</sup> 大正藏：以害其父；永樂北藏及龍藏：以其害父

人天樂，是名地獄。』又復，地者名命，獄者名長，以殺生故，得壽命長，故名地獄。大王！是故當知實無地獄。

「大王！如種麥得麥，種稻得稻，殺地獄者還得地獄，殺害於人應還得人。大王！今當聽臣所說，實無殺害。若有我者，實亦無害；若無我者，復無所害。何以故？若有我者，常不變易；以常住故，不可殺害，不破不壞，不繫不縛，不瞋不喜，猶如虛空。云何當有殺害之罪？若無我者，諸法無常；以無常故，念念壞滅；念念滅故，殺者、死者皆念念滅。若念念滅，誰當有罪？大王！如火燒木，火則無罪；如斧斫樹，斧亦無罪；如鎌<sup>171</sup>刈草，鎌實無罪。如刀殺人，刀實非人，刀既無罪，人云何罪？如毒殺人，毒實非人，毒藥無罪，人云何罪？一切萬物皆亦如是，實無殺害，云何有罪？唯願大王莫生愁苦。何以故？

若常愁苦 愁遂增長

如人喜眠 眠則滋多

貪婬嗜酒 亦復如是

如王所言『世無良醫治惡業』者，今有大師，名迦羅鳩駄迦旃延，一切知見，明了三世，於一

<sup>171</sup> 大正藏：鎌

念頃能見無量無邊世界，聞聲亦爾，能令眾生遠離過惡。猶如恒河，若內若外，所有諸罪皆悉清淨；是大良師亦復如是，能除眾生內外眾罪。為諸弟子說如是法：『若人殺害一切眾生，心無慚愧，終不墮惡，猶如虛空不受塵水，有慚愧者即入地獄，猶如大水潤濕於地。一切眾生悉是自在天之所作，自在天喜，眾生安樂；自在天瞋，眾生苦惱。一切眾生若罪若福，乃是自在之所為作<sup>172</sup>，云何當言人有罪福？譬如工匠作機關木人，行住坐卧，唯不能言；眾生亦爾。自在天者，譬如工匠；木人者，譬<sup>174</sup>眾生身。如是造化，誰當有罪？』如是大師，今者近在王舍城住，唯願速往。若得<sup>175</sup>見者，眾罪消滅。」

王即答言：「審有是人能滅我罪，我當歸依。」

復有一臣，名無所畏，往至王所，說如是言：「大王！世有愚人，一日之中百喜百愁、百眠百寤、百驚百哭，有智之人悉<sup>176</sup>無是事。大王！何故憂愁如是？如失侶客、如墮深泥無救拔者、如人渴乏不得漿水、猶如迷人無有導者、如困病人

<sup>172</sup> 大正藏：乃是自在天之所為；永樂北藏及龍藏：乃是自在之所為作

<sup>173</sup> 大正藏：喻

<sup>174</sup> 大正藏：喻

<sup>175</sup> 大正藏：如其；永樂北藏及龍藏：若得

<sup>176</sup> 大正藏：斯

無醫救療、如海船破無救接者。大王！今者為身痛耶？為心痛乎？」

王即答言：「我今身心豈得不痛？我近惡友，不觀口過，先王無罪<sup>177</sup>，橫興逆害。我今定知當入地獄，復無良醫而見救濟。」

臣即白言：「唯願大王莫生愁毒。夫剎利者，名為王種。若為國王<sup>178</sup>、若為沙門及婆羅門、為安人民，雖復殺害，無有罪也。先王雖復恭敬沙門，不能承事諸婆羅門，心無平等，無平等故，則非剎利。大王今者為欲供養諸婆羅門，殺害先王，當有何罪？大王！實無殺害。夫殺害者，殺害壽命。命名風氣。風氣之性不可斬<sup>179</sup>害，云何害命而當有罪？唯願大王莫復愁苦。何以故？

若常愁苦 愁遂增長

如人喜眠 眠則滋多

貪婬嗜酒 亦復如是

「如王所言『世無良醫能<sup>180</sup>療治』者，今有大師，名尼犍<sup>181</sup>若提子，一切知見，憐憫眾生，善知眾生諸根利鈍，達解一切，隨宜方便，世間

<sup>177</sup> 大正藏：辜

<sup>178</sup> 大正藏：土

<sup>179</sup> 大正藏：殺

<sup>180</sup> 大正藏：而

<sup>181</sup> 大正藏：尼乾陀；永樂北藏及龍藏：尼犍

八法所不能污，寂靜修習清淨梵行。為諸弟子說如是言：『無施無善，無父無母，無今世後世，無阿羅漢，無修無道。一切眾生經八萬劫，於生死輪自然得脫，有罪無罪悉亦如是。如四大河，所謂辛頭、恒河、博叉、私陀，悉入大海，無有差別；一切眾生亦復如是，得解脫時，悉無差別。是師今在王舍城住，唯願大王速往其所。若得見者，眾罪消除。』

王即答言：「審有是師能除我罪，我當歸依。」

爾時，大醫名曰耆婆，往至王所，白言：「大王！得安眠不？」

王以偈答<sup>182</sup>：

若有能永斷 一切諸煩惱  
不貪染三界 乃得安隱眠  
若得大涅槃 演說甚深義  
名真婆羅門 乃得安隱眠  
身無諸惡業 口離於四過  
心無有疑網 乃得安隱眠  
身心無熱惱 安住寂靜處  
獲致無上樂 乃得安隱眠  
心無有取著 遠離諸怨讎

<sup>182</sup> 大正藏：王以偈答言；永樂北藏及龍藏：王以偈答



常和無諍訟 乃得安隱眠  
若不造惡業 心常懷慚愧  
信惡有果報 乃得安隱眠  
敬養於父母 不害一生命  
不盜他財物 乃得安隱眠  
調伏於諸根 親近善知識  
破壞四魔眾 乃得安隱眠  
不見吉不吉 及以苦樂等  
為諸眾生故 輪轉於生死  
若能如是者 乃得安隱眠  
誰得安隱眠 所謂諸佛是  
深觀空三昧 身心安不動  
誰得安隱眠 所謂慈悲者  
常修不放逸 視眾如一子  
眾生無明冥 不見煩惱果  
常造諸惡業 不得安隱眠  
若為於自己<sup>183</sup> 及以他人身  
造作十惡業 不得安隱眠  
若言為樂故 害父無過咎  
隨順<sup>184</sup>惡知識 不得安隱眠

183 大正藏：身

184 大正藏：是

若食過節度 冷飲而過差  
如是則病苦 不得安隱眠  
若於王有過 邪念他婦女  
及行曠<sup>185</sup>路者 不得安隱眠  
持戒果未熟 太子未紹位  
盜者未獲財 不得安隱眠

「耆婆，我今病重，於正法王興惡逆害，一切良醫、妙藥、呪術、善巧、瞻病所不能治。何以故？我父先<sup>186</sup>王如法治國，實無過<sup>187</sup>咎，橫加逆害。如魚處陸，當有何樂？如鹿在弮，初無歡心；如人自知命不終日；如王失國，逃進他土；如人聞病不可療治；如破戒者聞說罪過。我昔曾聞智者說言：『身、口、意業若不清淨，當知是人必墮地獄。』我今<sup>188</sup>如是，云何當得安隱眠耶？今我又無無上大醫演說法藥，除我病苦。」

耆婆答言：「善哉！善哉！王雖作罪，心生重悔而懷慚愧。大王！諸佛世尊常說是言：『有二白法能救眾生：一，慚；二，愧。』慚者，自不作罪；愧者，不教他作。慚者，內自羞恥；愧者，發露向人。慚者，羞人；愧者，羞天。是名

<sup>185</sup> 大正藏：曠

<sup>186</sup> 大正藏：法

<sup>187</sup> 大正藏：辜

<sup>188</sup> 大正藏：亦

慚愧。無慚愧者，不名為人，名為畜生。有慚愧故，則能恭敬父母、師長；有慚愧故，說有父母、兄弟、姊妹。善哉！大王！具有慚愧。

「大王且聽，臣聞佛說：『智者有二：一者，不造諸惡；二者，作已懺悔。愚者亦二：一者，作罪；二者，覆藏。』雖先作惡，後能發露，悔已慚愧，更不敢作。猶如濁水置之明珠，以珠威力，水即為清。亦如<sup>189</sup>雲除，月則清明。作惡能悔亦復如是。王若懺悔懷慚愧者，罪則<sup>190</sup>除滅，清淨如本。

「大王！富有二種：一者，象馬種種畜生；二者，金銀種種珍寶。象馬雖多，不敵一珠。大王！眾生亦爾，一者，惡富；二者，善富。多作諸惡，不如一善。臣聞佛說：『修一善心破百種惡。』大王！如少金剛能壞須彌，亦如少火能燒一切，如少毒藥能害眾生，少善亦爾，能破大惡。雖名少善，其實是大。何以故？破大惡故。

「大王！如佛所說：『覆藏者漏，不覆藏者則無有漏。發露悔過，是故不漏。若作眾罪不覆不藏，以不覆故，罪則微薄；若悔<sup>191</sup>慚愧，罪則

<sup>189</sup> 大正藏：如烟；永樂北藏及龍藏：亦如

<sup>190</sup> 大正藏：即

<sup>191</sup> 大正藏：懷

消滅。』大王！如水滲雖微，漸盈大器；善心亦爾，一一善心能破大惡。若覆罪者，罪則增長；發露慚愧，罪則消滅。是故，諸佛說：『有智者，不覆藏罪。』

「善哉！大王！能信因果、信業、信報。唯願大王莫懷愁怖。若有眾生造作諸罪，覆藏不悔，心無慚愧，不見因果及以業報，不能諮啟有智之人，不近善友，如是之人，一切良醫乃至瞻病所不能治。如迦摩羅病，世醫拱手；覆罪之人亦復如是。云何罪人？謂一闍提。一闍提者，不信因果，無有慚愧，不信業報，不見現在及未來世，不親善友，不隨諸佛所說教戒<sup>192</sup>。如是之人，名一闍提，諸佛世尊所不能治。何以故？如世死屍，醫不能治。一闍提者亦復如是，諸佛世尊所不能治。大王今者非一闍提，云何而言不可救療？

「如王所言無能治者。大王當知，迦毗羅城淨飯王子，姓瞿曇氏，字悉達多，無師覺悟，自然而得阿耨多羅三藐三菩提。三十二相、八十種好莊嚴其身，具足十力、四無所畏、一切知見、大慈大悲，憐憫一切如羅睺羅，隨善眾生如犢逐母，知時而說，非時不語，實語、淨語、妙語、

<sup>192</sup> 大正藏：誠

義語、法語、一語，能令眾生永離煩惱。善知眾生諸根心性，隨宜方便無不通達。其智高大如須彌山，深邃廣遠猶如大海。是佛世尊有金剛智，能破眾生一切惡罪。若言不能，無有是處。

「今者去此十二由旬，在拘尸城<sup>193</sup>娑羅雙樹間，廣<sup>194</sup>為無量阿僧祇等諸菩薩僧演種種法：『若有若無；若有為若無為；若有漏若無漏；若煩惱果若善法果；若色法若非色法，若非色非非色法；若我若非我，若非我非非我；若常若非常，若非常非非常；若樂若非樂，若非樂非非樂；若相若非相，若非相非非相；若斷若非斷，若非斷非非斷；若世若出世，若非世非出世；若乘若非乘，若非乘非非乘；若自作自受，若自作他受，若無作無受。』大王！若當於佛所聞無作無受，所有重罪即當消滅。

「王今且聽，釋提桓因命將欲終有五相現：一者，衣裳垢膩；二者，頭上華萎；三者，身體臭穢；四者，腋下汗出；五者，不樂本座。時，天帝釋或於靜處，若見沙門若婆羅門，即至其所而生佛想<sup>195</sup>。爾時，沙門及婆羅門見帝釋來，深

<sup>193</sup> 大正藏：拘尸那城；永樂北藏及龍藏：拘尸城

<sup>194</sup> 大正藏：而

<sup>195</sup> 大正藏：生於佛想；永樂北藏及龍藏：而生佛想

自慶幸，即說是語：『天主！我今歸依於汝。』釋聞是已，乃知非佛，復自念言：『彼若非佛，不能治我五退沒相。』是時御臣，名般遮尸，語帝釋言：『憍尸迦！乾闥婆王名敦浮樓，其王有女，字須跋陀。王若能以此女見與，臣當示王除衰相處。』釋即答言：『善男子，毗摩質多阿脩羅王有女舍脂，是吾所敬。卿若必能示吾消滅惡相處者，猶當相與，況須跋陀？』『憍尸迦！有佛世尊字釋迦牟尼，今者在於王舍大城。若能往彼諮稟未聞，衰沒之相必得除滅。』『善男子，若佛世尊審能滅者，便可迴駕至其住處。』

「御臣奉命，即迴車乘到王舍城耆闍崛山，至於佛所，頭面禮足，却住<sup>196</sup>一面，釋提桓因白佛言<sup>197</sup>：『世尊！天人之中誰為繫縛？』答言：『憍尸迦<sup>198</sup>，慳、貪、嫉、妬。』又言：『慳、貪、嫉、妬，因何而生？』答言：『因無明生。』又言：『無明復因何生？』答言：『因放逸生。』又言：『放逸復因何生？』答言：『因顛倒生。』又言：『顛倒復因何生？』答言：『因疑心生。』『世尊！顛倒之法因疑生者，實如佛<sup>199</sup>教。何以故？我有疑

<sup>196</sup> 大正藏：坐

<sup>197</sup> 大正藏：白佛言；永樂北藏及龍藏：釋提桓因白佛言

<sup>198</sup> 大正藏：『憍尸迦；永樂北藏及龍藏：答言：『憍尸迦

<sup>199</sup> 大正藏：聖

心，以疑心故則生顛倒，於非世尊生世尊想。我今見佛，疑網即除；疑網除故，顛倒亦盡；顛倒盡故，無有慳心乃至妬心。』佛言：『汝言無有慳、妬心者，汝今已得阿那含耶？阿那含者，無有貪心。若無貪心，云何為命來至我所？如阿那含，實不求命。』『世尊！有顛倒者則有求命，無顛倒者則不求命。然我今者實不求命，所欲求者，唯佛法身及佛智慧。』『憍尸迦！求佛法身及佛慧者<sup>200</sup>，將來之世必當得之。』

「爾時，帝釋聞佛說已，五衰沒相即時消滅，便起作禮，繞佛三帀，恭敬合掌而白佛言：『世尊！我今即死即生，失命得命，從佛聞<sup>201</sup>記當得阿耨多羅三藐三菩提，是為更生！為更得命！世尊！一切人天云何增益？復以何緣而致損減？』

『憍尸迦！鬪諍因緣人天損減，善修和敬則得增益。』『世尊！若以鬪諍而損減者，我從今日更不復與阿脩羅戰。』佛言：『善哉！善哉！憍尸迦，諸佛世尊說忍辱法是阿耨多羅三藐三菩提因。』爾時，釋提桓因即前禮佛，於是還去。

「大王！如來以能除諸惡相，是故稱佛不可

<sup>200</sup> 大正藏：佛智慧；永樂北藏及龍藏：佛慧者

<sup>201</sup> 大正藏：又聞佛；永樂北藏及龍藏：從佛聞

思議。王若往者，所有重罪必當得除。

「大王且聽！有婆羅門子，字曰不害，以殺無量諸眾生故，名鴛崛魔。復欲害母，惡心起時，身亦隨動，身心動者即五逆因，五逆因故，必墮地獄。後見佛時，身心俱動，復欲生害，身心動者即五逆因，五逆因故，當入地獄。是人得遇如來大師，即時得滅地獄因緣，發阿耨多羅三藐三菩提心。是故稱佛為無上醫，非六師也。

「大王！復有須毗羅王子，其父瞋之，截其手足，推之深井。其母矜憫，使人牽出，將至佛所。即<sup>202</sup>見佛時，手足還具，便<sup>203</sup>發阿耨多羅三藐三菩提心。大王！以見佛故，得現果報。是故稱佛為無上醫，非六師也。

「大王！如恒河邊有諸餓鬼，其數五百，於無量歲初不見水。雖至河上，純見流火，飢渴所逼，發聲號哭。爾時，如來在於<sup>204</sup>河側鬱曇鉢林坐一樹下。時，諸餓鬼來至佛所，白言<sup>205</sup>：『世尊！我等飢渴，命將不久<sup>206</sup>。』佛言：『恒河流水，何故不飲<sup>207</sup>？』諸鬼<sup>208</sup>答言：『如來見水，我則

<sup>202</sup> 大正藏：尋

<sup>203</sup> 大正藏：即

<sup>204</sup> 大正藏：其

<sup>205</sup> 大正藏：白佛言；永樂北藏及龍藏：白言

<sup>206</sup> 大正藏：遠

<sup>207</sup> 大正藏：汝何不飲；永樂北藏及龍藏：何故不飲



見火。』佛言：『恒河清流，實非<sup>209</sup>火也。汝<sup>210</sup>惡業故，心自顛倒，謂為是火。我當為汝除滅顛倒，令汝見水。』爾時，世尊廣為諸鬼說慳貪過。諸鬼復<sup>211</sup>言：『我今渴乏，雖聞法言都不入心。』佛言：『汝若渴乏，先可入河<sup>212</sup>恣意飲之。』是諸鬼等以佛力故即得飲水。既飲水已，如來復為種種說法。既聞法已，悉發阿耨多羅三藐三菩提心，捨餓鬼形，而得<sup>213</sup>天身。大王！是故稱佛為無上醫，非六師也。

「大王！舍婆提國群賊五百，波斯匿王挑出其目，無有<sup>214</sup>前導，不能得往至於佛所。佛憐憫故，即到其前<sup>215</sup>慰喻之言：『善男子，善護身、口，勿更<sup>216</sup>造惡。』諸賊爾<sup>217</sup>時聞如來音微妙清徹，尋還得眼，即於佛前合掌禮佛而白佛言：『世尊！我今知佛慈心普覆一切眾生，非獨人、天。』爾時，如來即為說法，既聞法已，悉發阿耨多羅三藐三菩提心。是故，如來真是世間無上良醫，非

<sup>208</sup> 大正藏：鬼即；永樂北藏及龍藏：諸鬼

<sup>209</sup> 大正藏：無

<sup>210</sup> 大正藏：以

<sup>211</sup> 大正藏：即

<sup>212</sup> 大正藏：先入河水；永樂北藏及龍藏：先可入河

<sup>213</sup> 大正藏：得於；永樂北藏及龍藏：而得

<sup>214</sup> 大正藏：盲無；永樂北藏及龍藏：無有

<sup>215</sup> 大正藏：即至賊所；永樂北藏及龍藏：即到其前

<sup>216</sup> 大正藏：更勿；永樂北藏及龍藏：勿更

<sup>217</sup> 大正藏：即

六師也。

「大王！舍婆提國有旃陀羅，名曰氣噓，殺無量人。見佛弟子大目犍<sup>218</sup>連，即時得破地獄因緣，而得上生三十三天。以有如是聖弟子故，稱佛如來為無上醫，非六師也。

「大王！波羅奈<sup>219</sup>城有長者子，名阿逸多，通其母故而殺其父<sup>220</sup>，母更外通尋復害之<sup>221</sup>。有阿羅漢是其知識，於此知識生於<sup>222</sup>愧恥，即便殺之。殺已即到祇桓精舍，求欲出家。時，諸比丘具知此人有三逆罪，無敢聽者。以不聽故，倍生瞋恚，即於其夜放大<sup>223</sup>猛火焚燒僧坊，多殺無辜。然後復往王舍城中，至如來所，求哀出家。如來即聽，與<sup>224</sup>說法要，令其重罪漸漸輕微，發阿耨多羅三藐三菩提心。是故，稱佛為世良醫，非六師也。

「大王本性暴惡<sup>225</sup>，信受惡人提婆達多，放大醉象欲令踐佛。象既見佛，即時醒悟。佛便伸

<sup>218</sup> 大正藏：犍

<sup>219</sup> 大正藏：波羅捺城

<sup>220</sup> 大正藏：姪匿其母，以是因緣殺戮其父；永樂北藏及龍藏：通其母故而殺其父

<sup>221</sup> 大正藏：其母復與外人共通，子既知已，便復殺之；永樂北藏及龍藏：母更外通尋復害之

<sup>222</sup> 大正藏：復生；永樂北藏及龍藏：生於

<sup>223</sup> 大正藏：大放；永樂北藏及龍藏：放大

<sup>224</sup> 大正藏：為

<sup>225</sup> 大正藏：大王！王本性暴惡；永樂北藏及龍藏：大王本性暴惡

<sup>226</sup>手摩其頂上，復為說法，悉令得發阿耨多羅三藐三菩提心。大王！畜生見佛猶得破壞畜生業果，況復人耶？大王當知，若見佛者，所有重罪必當得滅。

「大王！世尊未得阿耨多羅三藐三菩提時，魔與無量無邊眷屬至菩薩所，菩薩爾時，以忍辱力壞魔惡心，令魔受法，尋發阿耨多羅三藐三菩提心，佛有如是大功德力。

「大王！有曠野鬼多害眾生，如來爾時為善賢長者，至曠野村為其說法。時，曠野鬼聞法歡喜，即以長者授於如來，然後便發阿耨多羅三藐三菩提心。

「大王！波羅捺國有屠兒，名曰廣額，於日日中殺無量羊，見舍利弗即受八戒經一日夜，以是因緣，命終得為北方天王毗沙門子。如來弟子尚有如是大功德果，況復佛耶<sup>227</sup>？

「大王！北天竺有城，名曰細石，其城有王，名曰龍印，貪國重位而殺其父<sup>228</sup>，殺<sup>229</sup>其父已，心生悔恨，即捨國政，來至佛所，求哀出家。佛言：『善來。』即成比丘，重罪消滅，發阿耨多羅

<sup>226</sup> 大正藏：申

<sup>227</sup> 大正藏：也

<sup>228</sup> 大正藏：戮害其父；永樂北藏及龍藏：而殺其父

<sup>229</sup> 大正藏：害

三藐三菩提心。

「大王當知：佛有如是無量<sup>230</sup>大功德果。

「大王！如來有弟提婆達多，破壞眾僧，出佛身血，害蓮華比丘尼，作三逆罪。如來為說種種法要，令其重罪尋得微薄。是故，如來為大良醫，非六師也。

「大王！若能信臣語者，唯願速往至如來所。若不見信，願善思之。

「大王！諸佛世尊大悲普覆，不限一人，正法弘廣，無所不包，怨親平等，心無憎愛，終不偏為一人令得阿耨多羅三藐三菩提，餘人不得。如來非獨四部之師，普是一切天、人、龍、鬼、地獄、畜生、餓鬼等師。一切眾生亦當視佛如父母想。大王當知，如來不但獨為豪貴<sup>231</sup>跋提迦王而演說法，亦為下賤優波離等；不獨偏受須達多阿那邠坻所奉供養<sup>232</sup>，亦受貧人須達多食；不但獨為舍利弗等利根說法，亦為鈍根周利<sup>233</sup>槃特；不但獨聽大迦葉等無貪之性出家求道，亦聽大貪難陀出家；不但獨聽煩惱薄者優樓頻螺、迦葉等出家求道，亦聽煩惱深厚造重罪者波斯匿王弟修

<sup>230</sup> 大正藏：無量無邊；永樂北藏及龍藏：無量

<sup>231</sup> 大正藏：豪貴之人；永樂北藏及龍藏：豪貴

<sup>232</sup> 大正藏：飯食；永樂北藏及龍藏：供養

<sup>233</sup> 大正藏：梨

<sup>234</sup>陀耶出家求道；不以莎<sup>235</sup>草恭敬供養拔其瞋根，  
鴛崛魔<sup>236</sup>羅惡心欲害捨而不救；不但獨為有智男  
子而演說法，亦為極愚、判<sup>237</sup>合婚<sup>238</sup>者女人說法；  
不但獨令出家之人得四道果，亦令在家得三道果；  
不但獨為富多羅等捨諸忽務、閑寂思惟而說法要，  
亦為頻婆娑羅王等統領國事、理王務者而說法要；  
不但獨為斷酒之人，亦為耽酒郁伽長者荒醉者說；  
不但獨為入禪定者離婆多等，亦為喪子亂心婆羅  
門女婆斯<sup>239</sup>吒說；不但獨為己之弟子，亦為外道  
尼犍<sup>240</sup>子說；不但獨為盛壯之年二十五者，亦為  
衰老八十者說；不但獨為根熟之人，亦為善根未  
熟者說；不但獨為末利夫人，亦為姪女蓮華女說；  
不但獨受波斯匿王上饌甘味，亦受長者尸利毬多  
雜毒之食。

「大王當知，尸利毬多往昔亦作逆罪之因，  
以遇佛聞法，即發阿耨多羅三藐三菩提心。大王！  
假使一月常以衣食供養恭敬一切眾生，不如有人  
一念念佛所得功德十六分一。大王！假使鍛金為

<sup>234</sup> 大正藏：優

<sup>235</sup> 大正藏：縈

<sup>236</sup> 大正藏：摩

<sup>237</sup> 大正藏：牒

<sup>238</sup> 大正藏：智

<sup>239</sup> 大正藏：私

<sup>240</sup> 大正藏：乾

人，車馬載寶，其數各百以用布施，不如有人發心向佛舉足一步。大王！假使復以象車百乘，載大秦國種種珍寶，及其女人身佩瓔珞數亦滿百，持用布施，猶故不如發心向佛舉足一步。復置是事，若以四事供養三千大千世界所有眾生，猶亦不如發心向佛舉足一步。復置是事，若使大王供養恭敬恒河沙等無量眾生，不如一往娑羅雙樹，到如來所，誠心聽法。」

爾時，大王答耆婆言：「如來<sup>241</sup>世尊性已調柔，故得調柔以為眷屬。如栴檀林純以栴檀而為圍繞；如來清淨，所有眷屬亦復清淨。猶如大龍純以諸龍而為眷屬；如來寂靜，所有眷屬亦復寂靜；如來無貪，所有眷屬亦復無貪；佛無煩惱，所有眷屬亦無煩惱。吾今既是極惡之人，惡業纏裹，其身臭穢，繫屬地獄，云何當得至如來所？吾設往者，必<sup>242</sup>不顧念接緒<sup>243</sup>言說。卿雖勸吾令往佛所，然吾今日深自鄙悼，都無去心。」

爾時，空中<sup>244</sup>尋出聲言：「無上佛法將欲衰殄，甚深法河於今<sup>245</sup>欲涸，大法明燈將滅不久，

<sup>241</sup> 大正藏：大王答言：「耆婆，如來；永樂北藏及龍藏：大王答耆婆言：「如來

<sup>242</sup> 大正藏：恐

<sup>243</sup> 大正藏：敘

<sup>244</sup> 大正藏：虛空；永樂北藏及龍藏：空中

<sup>245</sup> 大正藏：是

法山欲頹，法船欲沒<sup>246</sup>，法橋欲壞，法殿欲崩，法幢欲倒，法樹欲折，善友欲去，大怖將至，法餓眾生將至不久，煩惱疫病將欲流行，大闇時至，渴法時到<sup>247</sup>，魔王欣慶，解釋甲冑，佛日將沒大涅槃山。

「大王！佛若去世，王之重惡更無治者。大王！汝今已造阿鼻地獄極重之業，以是業緣，必受不疑。大王！阿者言無，鼻者名間，間無暫樂，故名無間。大王！假使一人獨墮是獄，其身長大八萬由旬，遍滿其中，間無空處，其身周而受種種苦。設有多人，身亦遍滿，不相妨閔。大王！寒地獄中，暫遇熱風以之為樂；熱地獄中，暫遇寒風亦以<sup>248</sup>為樂；有地獄中，設命終已，若聞活聲即便還活。阿鼻地獄都無此事。大王！阿鼻地獄四面<sup>249</sup>有門，一一門外各有猛火，東、西、南、北交過通徹八萬由旬，周而鐵牆、鐵網彌覆，其地亦鐵，上火徹下，下火徹上。大王！若魚在鑿<sup>250</sup>，脂膏焦然；是中罪人亦復如是。大王！作一逆者，則便具受如是一罪；若造二逆，罪則二倍；

<sup>246</sup> 大正藏：沈

<sup>247</sup> 大正藏：來

<sup>248</sup> 大正藏：名

<sup>249</sup> 大正藏：方

<sup>250</sup> 大正藏：鑿

五逆具者，罪亦五倍。大王！我今定知王之惡業必不得免，唯願大王速往佛所，除佛世尊餘無能救。我今憫汝，故相勸導。」

爾時，大王聞是語已，心懷怖懼，舉身戰慄，五體掉動如芭蕉樹，仰而問<sup>251</sup>曰：「天<sup>252</sup>為是誰？不現色像而但有聲。」

「大王！吾是汝父頻婆娑羅，汝今當隨耆婆所說，莫隨邪見六臣之言。」

時王聞已，悶絕躄地，身瘡增劇，臭穢倍前，雖以冷藥塗治將療<sup>253</sup>，瘡烝毒熱但增無損。

大般涅槃經卷第十七

<sup>251</sup> 大正藏：答

<sup>252</sup> 大正藏：汝

<sup>253</sup> 大正藏：塗而治之；永樂北藏及龍藏：塗治將療



# 大般涅槃經卷第十八

北涼天竺三藏曇無讖譯 梵

宋沙門慧嚴慧觀同謝靈運再治

## 梵行品第二十之五<sup>254</sup>

爾時，世尊在雙樹間見阿闍世悶絕躄地，即告大眾：「我今當為是王，住世至無量劫不入涅槃。」

迦葉菩薩白佛言：「世尊！如來當為無量眾生不入涅槃，何故獨為阿闍世王？」

佛言：「善男子，是大眾中，無有一人謂我必<sup>255</sup>定入於涅槃。阿闍世王定謂我當畢竟永滅，是故悶絕，自投於地。」

「善男子，如我所言為阿闍世不入涅槃，如是密義，汝未能解。何以故？我言為者，一切凡夫；阿闍世者，普及一切造五逆者。又復為者，即是一切有為眾生，我終不為無為眾生而住於世。何以故？夫無為者，非眾生也。阿闍世者，即是具足煩惱等者。又復為者，即是不見佛性眾生。」

<sup>254</sup> 大正藏：梵行品之第五

<sup>255</sup> 大正藏：畢

若見佛性，我終不為久住於世。何以故？見佛性者，非眾生也。阿闍世者，即是一切未發阿耨多羅三藐三菩提心者。又復為者，即是阿難、迦葉二眾。阿闍世者，即是阿闍世王後宮妃后及王舍城一切婦女。又復為者，名為佛性；阿闍者<sup>256</sup>，名為不生；世者，名怨。以不生佛性故，則煩惱怨生；煩惱怨生故，不見佛性。以不生煩惱故，則見佛性；以見佛性<sup>257</sup>，則得安住大般涅槃，是名不生。是故，名為為阿闍世<sup>258</sup>。善男子，阿闍者，名不生；不生者，名涅槃；世，名世法；為者，名不污，以世八法所不污故，無量無邊阿僧祇劫不入涅槃。是故，我言為阿闍世無量億劫不入涅槃。

「善男子，如來密語不可思議，佛、法、眾僧亦不可思議，菩薩摩訶薩亦不可思議，大涅槃經亦不可思議。」

爾時，世尊大悲導師，為阿闍世王入月愛三昧，入三昧已，放大光明。其光清涼，往照王身，身瘡即愈，鬱蒸除滅。王覺瘡愈，身體清涼，語耆婆言：「曾聞人說：『劫將欲盡，三月並現，當

<sup>256</sup> 大正藏：言阿闍者；永樂北藏及龍藏：阿闍者

<sup>257</sup> 大正藏：以見佛性故；永樂北藏及龍藏：以見佛性

<sup>258</sup> 大正藏：（名為）為阿闍世；永樂北藏及龍藏：名為為阿闍世

爾<sup>259</sup>之時，一切眾生患苦悉除。』時既未至，此光何來照觸吾身，瘡苦除愈，身得安樂？」

耆婆答言：「此非劫盡三月並照，亦非火日、星宿、藥草、寶珠天光。」

王又問言：「此光若非三月並照、寶珠明者，為是誰光？」

「大王當知，是天中天所放光明。是光無根無有邊際，非熱非冷，非常非滅，非色非無色，非相非無相，非青非黃、非赤非白，欲度眾生故使可見、有相可說、有根有邊、有熱有冷、青黃赤白。大王，是光雖爾，實不可說，不可覩見，乃至無有青黃赤白。」

王言：「耆婆，彼天中天以何因緣放斯光明？」

耆婆答言：「今是瑞相將為大王。以王先言：『世無良醫療治身心。』故放此光，先治王身，然後及心。」

王言：「耆婆，如來世尊亦見念耶？」

耆婆答言：「譬如一人而有七子，是七子中，一子遇病，父母之心非不平等，然於病子心則偏重<sup>260</sup>。大王！如來亦爾，於諸眾生非不平等，然

<sup>259</sup> 大正藏：是

<sup>260</sup> 大正藏：多

於罪者心則偏重。於放逸者，則生<sup>261</sup>慈念；不放逸者，心則放捨。何等名為不放逸者？謂六住菩薩。大王！諸佛世尊於諸眾生不觀種姓、老少中年、貧富、時節、日月星宿、工巧、下賤、僮僕婢使，唯觀眾生有善心者。若有善心，則便慈念。大王當知，如是瑞相即是如來入月愛三昧所放光明。」

王即問言：「何等名為月愛三昧？」

耆婆答言：「譬如月光，能令一切優鉢羅華開敷鮮明；月愛三昧亦復如是，能令眾生善心開敷。是故，名為月愛三昧。」

「大王！譬如月光，能令一切行路之人心生歡喜；月愛三昧亦復如是，能令修習涅槃道者，心生歡喜。是故，復名月愛三昧。」

「大王！譬如月光，從初一日至十五日，形色光明漸漸增長。月愛三昧亦復如是，令初發心諸善根本漸漸增長，乃至具足大般涅槃。是故，復名月愛三昧。」

「大王！譬如月光從十六日至三十日，形色光明漸漸損減。月愛三昧亦復如是，光所照處，

<sup>261</sup> 大正藏：佛則；永樂北藏及龍藏：則生

所有煩惱能令漸滅<sup>262</sup>。是故，復名月愛三昧。

「大王！如盛熱時<sup>263</sup>，一切眾生常思月光；月光既照，鬱熱即除。月愛三昧亦復如是，能令眾生除貪惱熱。

「大王！譬如滿月，眾星中王，為甘露味，一切眾生之所愛樂。月愛三昧亦復如是，諸善中王，為甘露味，一切眾生之所愛樂。是故，復名月愛三昧。」

王語耆婆：「我聞如來不與惡人同止坐起、語言談論，猶如大海不宿死屍，如鴛鴦鳥不住圍廁，釋提桓因不與鬼住，鳩翅羅鳥不棲枯樹，如來亦爾。我當云何而得往見？設令<sup>264</sup>見者，我身將無<sup>265</sup>陷入地耶？我觀如來寧近醉象、師子、虎、狼、猛火絕焰，終不接近<sup>266</sup>重惡之人。是故，我今思惟如是<sup>267</sup>，當有何心往見如來？」

耆婆答言：「大王！譬如渴人速赴清泉、飢者求食、怖者求救、病者求醫<sup>268</sup>、熱者求涼<sup>269</sup>、寒者求衣<sup>270</sup>，王今求佛亦應如是。大王！如來尚

<sup>262</sup> 大正藏：減

<sup>263</sup> 大正藏：譬如盛熱之時；永樂北藏及龍藏：如盛熱時

<sup>264</sup> 大正藏：其

<sup>265</sup> 大正藏：不

<sup>266</sup> 大正藏：近於；永樂北藏及龍藏：接近

<sup>267</sup> 大正藏：思忖是已；永樂北藏及龍藏：思惟如是

<sup>268</sup> 大正藏：病求良醫；永樂北藏及龍藏：病者求醫

<sup>269</sup> 大正藏：熱求蔭涼；永樂北藏及龍藏：熱者求涼

<sup>270</sup> 大正藏：火

為一闍提等演說法要，何況大王非一闍提而當不蒙慈悲救濟？」

王言：「耆婆，我昔曾聞：『一闍提者，不信、不聞、不能觀察、不得義理。』何故如來而為說法？」

耆婆答言：「大王！譬如有人，身遇重病，是人夜夢昇一柱殿，服酥<sup>271</sup> 油脂及以塗身，卧灰食灰，攀上枯樹。或與獼猴遊行坐卧、沈水没泥，墮墜樓殿、高山、樹木，象馬牛羊身著青黃赤黑色衣，喜笑歌舞。或見烏鷲狐狸之屬，齒髮墮落，裸形枕狗，卧糞穢中。復與亡者行住坐起，携手食啖<sup>272</sup>，毒蛇滿路而從中過。或復夢與被髮女人共相抱持，多羅樹葉以為衣服，乘壞驢車正南而遊。是人夢已，心生愁惱，以愁惱故，身病轉<sup>273</sup>增。以病增故，諸家親屬遣使請<sup>274</sup>醫。所可遣使，形體缺短，根不具足，頭蒙塵土，著弊壞衣，載故壞車，語彼醫言：『速疾上車。』爾時，良醫即自思惟：『今見是使相貌不吉，當知病者難可療治。』復作是念：『使雖不吉，當復<sup>275</sup>占日，為可

<sup>271</sup> 大正藏：蘇

<sup>272</sup> 大正藏：噉

<sup>273</sup> 大正藏：愈

<sup>274</sup> 大正藏：命

<sup>275</sup> 大正藏：復當：永樂北藏及龍藏：當復

治不？若四日、六日、八日、十二日、十四日，如是日者，病亦難治。』復作是念：『日雖不吉，當復<sup>276</sup>占星，為可治不？若是火星、奎<sup>277</sup>星、昴星、閻羅王星、濕星、滿星，如是星時，病亦難治。』復作是念：『星雖不吉，復當觀時。若是秋時、冬時及日入時、夜半時、月入時，當知是病亦難可治。』復作是念：『如是眾相雖復不吉，或定不定，當觀病人，若有福德，皆可療治；若無福德，雖吉何益？』思惟是已，尋與使俱，在路復念：『若彼病者有長壽相則可療治，短壽相者則不可治。』即於前路，見二小兒相牽鬪爭，捉頭拔髮，瓦石、刀杖共相打擲<sup>278</sup>；見人持火，自然盡<sup>279</sup>滅；或見有人斫伐樹木；或復見人手曳皮革，隨路而行；或見道路有遺落物；或見有人執持空器；或見沙門獨行無侶；復見虎、狼、烏鷲、野狐。見是事已，復作是念：『所遣使人乃至道路所見諸相悉皆不祥，當知病者定難療治。』復作是念：『我若不往，則非良醫<sup>280</sup>；如其往者，不可救療。』復更念言：『如是眾相雖復不祥，且

<sup>276</sup> 大正藏：復當：永樂北藏及龍藏：當復

<sup>277</sup> 大正藏：金

<sup>278</sup> 大正藏：撩打：永樂北藏及龍藏：打擲

<sup>279</sup> 大正藏：殄

<sup>280</sup> 大正藏：師

當捨置，往至病所。』思惟是已，復於前路聞如是聲，所謂亡失、死喪、崩破、壞析<sup>281</sup>、剝脫、墮墜、焚燒、不來，不可療治、不能拔濟。復聞南方有鳥獸聲<sup>282</sup>，所謂烏鷲、舍利鳥聲，若狗、若鼠、野狐、猪、兔。聞是聲已，復作是念：『當知病者難可療治。』

「爾時，即入病人舍宅，見彼病人數寒數熱，骨節疼痛，目赤流淚，耳聲聞外，咽喉結痛，舌上裂破，其色正黑，頭不自勝，體枯無汗，大小便利閉塞<sup>283</sup>不通，身卒肥大，紅赤異常，語聲不調<sup>284</sup>，或麤或細，舉體斑駁，異色青黃，其腹脹滿，言語不了。醫見是已，問瞻病人<sup>285</sup>：『病者昨來意志云何？』答言：『大師！其人本來敬信三寶及以諸天，今者變異，敬信情息。本憇惠施，今者慳吝。本性少食，今則過多。本性敝惡，今則和善。本性慈孝、恭敬父母，今於父母無恭敬心。』醫聞是已，即前嗅之，優鉢羅香、沈水雜香、畢迦香<sup>286</sup>、多伽羅香、多摩羅跋香、鬱金香、

<sup>281</sup> 大正藏：折

<sup>282</sup> 大正藏：飛鳥聲：永樂北藏及龍藏：鳥獸聲

<sup>283</sup> 大正藏：擁隔：永樂北藏及龍藏：閉塞

<sup>284</sup> 大正藏：均

<sup>285</sup> 大正藏：言

<sup>286</sup> 大正藏：畢迦多香：永樂北藏及龍藏：畢迦香



梅檀香，炙肉臭、蒲萄<sup>287</sup>酒臭、燒筋骨臭、魚臭、糞臭。知香臭已，即前觸身，覺身細軟，猶如繒綿劫貝娑<sup>288</sup>華，或堅<sup>289</sup>如石，或冷如冰<sup>290</sup>，或熱如火，或澁如沙。

「爾時，良醫見如是等種種相已，定知病者必死不疑，然不定言是人當死。語瞻病者：『吾今遽務，明當更來。隨其所須，恣意勿禁<sup>291</sup>。』即便還家。明日使到，復語使言：『我事未訖，兼未合藥。』智者當知，如是病者，必死不疑。

「大王！世尊亦爾，於一闍提輩善知根性而為說法。何以故？若不為說，一切凡夫當言：『如來無大慈悲。』有慈悲者，名一切智；若無慈悲，云何說言一切智人？是故，如來為一闍提而演說法。

「大王！如來世尊見諸病者，常施法藥。病者不服，非如來咎。

「大王！一闍提輩分別有二：一者，得現在善根；二者，得後世善根。如來善知一闍提輩能於現在得善根者，則為說法；後世得者，亦為說

<sup>287</sup> 大正藏：蒲桃

<sup>288</sup> 大正藏：縈

<sup>289</sup> 大正藏：鞞

<sup>290</sup> 大正藏：或冰如冷：永樂北藏及龍藏：或冷如冰

<sup>291</sup> 大正藏：遮

法，今雖無益，作後世因。是故，如來為一闡提演說法要。一闡提者復有二種：一者，利根；二者，中根。利根之人於現在世能得善根，中根之人後世則得。諸佛世尊不空說法。大王！譬如淨人墜墮圍廁，有善知識見而憫之，尋前捉髮拔之令出<sup>292</sup>。諸佛如來亦復如是，見諸眾生墮三惡道，方便救濟令得出離。是故，如來為一闡提而演說法。」

王語耆婆：「若使如來審如是者，明當選擇良日吉星，然後乃往。」

耆婆白王：「如來法中<sup>293</sup>，無有選擇良日吉星。大王！如重病人不擇良日<sup>294</sup>、時節吉凶，唯求良醫。王今病重，求佛良醫不應選擇良時好日。大王！如栴檀火及伊<sup>295</sup>蘭火，二俱燒相，無有異也。吉日、凶日亦復如是，若至<sup>296</sup>佛所，俱得滅罪。唯願大王今日速往。」

爾時，大王即命一臣名曰吉祥，而告之言：「大臣當知，吾今欲往佛世尊所，速辦供養所須<sup>297</sup>之具。」

<sup>292</sup> 大正藏：而拔出之：永樂北藏及龍藏：拔之令出

<sup>293</sup> 大正藏：大王，如來法中：永樂北藏及龍藏：如來法中

<sup>294</sup> 大正藏：猶不看日：永樂北藏及龍藏：不擇良日

<sup>295</sup> 大正藏：苾

<sup>296</sup> 大正藏：到

<sup>297</sup> 大正藏：所須供養：永樂北藏及龍藏：供養所須

臣言：「大王！善哉！善哉！所須供具一切悉有。」

阿闍世王與其夫人，嚴駕輦<sup>298</sup>乘一萬二千，巨力<sup>299</sup>大象其數五萬，一一象上各有<sup>300</sup>三人，齎持旛蓋、華香、妓<sup>301</sup>樂，種種供具無不具<sup>302</sup>足，導從馬騎有十八萬，摩伽陀國所有人民尋從王者五十八萬<sup>303</sup>。爾時，拘尸城<sup>304</sup>所有大眾滿十二由旬，悉皆遙見阿闍世王與其眷屬尋路而來。

爾時，佛告諸大眾言：「一切眾生為阿耨多羅三藐三菩提近因緣者，無<sup>305</sup>先善友。何以故？阿闍世王若不隨順耆婆語者，來月七日必定命終墮阿鼻獄。是故，近因莫若善友。」

阿闍世王復於前路，聞舍婆提毗流離王乘船入海遇火而死，瞿伽離比丘生身入地至阿鼻獄，須那剎多作種種惡到於佛所眾罪得滅。聞是語已，語耆婆言：「吾今雖聞如是二語<sup>306</sup>，猶未審定。汝來，耆婆，吾欲與汝同載一象。設我當入阿鼻地獄，冀汝捉持，不令我墮。何以故？吾昔曾聞

<sup>298</sup> 大正藏：車

<sup>299</sup> 大正藏：殊壯：永樂北藏及龍藏：巨力

<sup>300</sup> 大正藏：載

<sup>301</sup> 大正藏：伎

<sup>302</sup> 大正藏：備

<sup>303</sup> 大正藏：其數足滿五十八萬：永樂北藏及龍藏：五十八萬

<sup>304</sup> 大正藏：拘尸那城：永樂北藏及龍藏：拘尸城

<sup>305</sup> 大正藏：莫

<sup>306</sup> 大正藏：言

得道之人不入地獄。」

爾時，佛告諸大眾言：「阿闍世王猶有疑意<sup>307</sup>，我今當為作決定心。」

爾時，會中有一菩薩，名持一切，白佛言：「世尊！如佛先說：『一切諸法皆無定相，所謂色無定相乃至涅槃亦無定相。』如來今者云何而言為阿闍世作決定心？」

佛言：「善哉！善哉！善男子，我今定為阿闍世王作決定心。何以故？若王疑心可破壞者，當知諸法無有定相。是故，我為阿闍世王作決定心，當知是心為無定定<sup>308</sup>。善男子，若彼王心是決定者，王之逆罪云何可壞？以無定相，其罪可壞。是故，我為阿闍世王作決定心。」

爾時，大王即往<sup>309</sup>娑羅雙樹間，至於佛所，仰瞻如來三十二相、八十種好，猶如微妙真金之山。

爾時，世尊出八種聲告言：「大王。」

時，阿闍世左右顧視：「此大眾中誰是<sup>310</sup>大王？我既罪逆，又無福德，如來不應稱為大王。」

爾時，如來即復喚言：「阿闍世大王。」

<sup>307</sup> 大正藏：心

<sup>308</sup> 大正藏：無決定；永樂北藏及龍藏：無定定

<sup>309</sup> 大正藏：到

<sup>310</sup> 大正藏：為

時，王聞已，心大歡喜，即作是言：「如來今日顧以愛言<sup>311</sup>，真知如來於諸眾生大悲憐憫等無差別。」即白佛言<sup>312</sup>：「世尊！我今疑心永無遺餘，定知如來真是眾生無上大師。」

爾時，迦葉菩薩語持一切菩薩言：「如來已為阿闍世王作決定心。」

阿闍世王復<sup>313</sup>白佛言：「世尊！假使我今得與梵王釋提桓因坐起飲食，猶不欣悅；得遇如來一言顧命，深以欣慶。」即以所持<sup>314</sup>旛蓋、香華、妓樂供養，前禮佛足，右繞三匝。禮敬畢已，却坐一面。

爾時，佛告阿闍世王言：「大王，今當為汝說正法要，汝當一心諦聽諦聽。凡夫常當繫心觀身有二十事：一，我此<sup>315</sup>身中空無無漏；二，無諸善根<sup>316</sup>；三，我此生死未得調順；四，墮墜深坑，無處不畏；五，以何方便得見佛性？六，云何修定得見佛性？七，生死常苦，無常樂<sup>317</sup>我淨；八，八難之難難得遠離；九，恒為怨家之所追逐；

<sup>311</sup> 大正藏：顧命語言：永樂北藏及龍藏：顧以愛言

<sup>312</sup> 大正藏：白佛言：永樂北藏及龍藏：即白佛言

<sup>313</sup> 大正藏：爾時，阿闍世王即：永樂北藏及龍藏：阿闍世王復

<sup>314</sup> 大正藏：爾時，阿闍世王即以所持：永樂北藏及龍藏：即以所持

<sup>315</sup> 大正藏：謂我此：永樂北藏及龍藏：我此

<sup>316</sup> 大正藏：善根本：永樂北藏及龍藏：善根

<sup>317</sup> 大正藏：無常：永樂北藏及龍藏：無常、樂

十，無有一法能遮諸有；十一，於三惡趣未得解脫；十二，具足種種諸惡邪見；十三，亦未造立度<sup>318</sup>五逆津；十四，生死無際，未得其邊；十五，不作諸業不得果報；十六，無有我作他人受果；十七，不作樂因，終無樂果；十八，若有造業，果終不失；十九，因無明生，亦因而死；二十，去、來、現在常行放逸。

「大王，凡夫之人當<sup>319</sup>於此身常<sup>320</sup>作如是二十種觀。作是觀已，不樂生死；不樂生死，則得止觀。爾時，次第觀心生相、住相、滅相。次第觀心生、住、滅相<sup>321</sup>，定、慧、進、戒亦復如是。觀生、住、滅已，知心相乃至戒相，終不作惡，無有死畏、三惡道畏。若不繫心觀察如是二十事者，心則放逸，無惡不造。」

阿闍世言：「如我解佛所說義者，我從昔來，未曾觀<sup>322</sup>是二十事，故多造眾惡<sup>323</sup>。造眾惡故，則有死畏、三惡道畏。世尊！自我招殃，造茲重惡，父王無辜，橫加逆害，是二十事設觀不觀，必定當墮阿鼻地獄。」

<sup>318</sup> 大正藏：渡

<sup>319</sup> 大正藏：常

<sup>320</sup> 大正藏：當

<sup>321</sup> 此句，大正藏及麗藏有；永樂北藏及龍藏無

<sup>322</sup> 大正藏：初未曾觀；永樂北藏及龍藏：未曾觀

<sup>323</sup> 大正藏：故造眾惡；永樂北藏及龍藏：故多造眾惡

佛告大王：「一切諸法性相無常，無有決定，王云何言必定當墮阿鼻地獄？」

阿闍世王白佛言：「世尊！若一切法無定相者，我之殺罪亦應不定。若殺定者，一切諸法則非不定。」

佛言：「大王，善哉！善哉！諸佛世尊說一切法悉無定相，王復能知殺亦不定，是故當知，殺無定相。」

「大王，如汝所言『父王無辜，橫加逆害』者，何者是父？但於假名眾生五陰妄生父想。於十二入、十八界中，何者是父？若色是父，四陰應非；若四是父，色亦應非。若色、非色合為父者，無有是處。何以故？色與非色性無合故。大王，凡夫眾生於是色陰妄生父想，如是色陰亦不可害。何以故？色有十種，是十種中，唯色一種可見可持，可稱可量，可牽可縛。雖可見縛，其性不住。以不住故，不可得見，不可捉持，不可稱量，不可牽縛。色相如是，云何可殺？若色是父，可殺可害獲罪報者，餘九應非。若九非者，則應無罪。」

「大王，色有三種：過去、未來、現在。過去、現在則不可害。何以故？過去過去故，現在

念念滅故。遮未來故，名之為殺。如是一色，或有可殺，或不可殺。有殺不殺，色則不定；若色不定，殺亦不定；殺不定故，報亦不定。云何說言定入地獄？

「大王，一切眾生所作罪業凡有二種：一者，輕；二者，重。若心、口作，則名為輕；身、口、心作，則名為重。大王，心念口說，身不作者，所得報輕。

「大王昔日口不教<sup>324</sup>殺，唯<sup>325</sup>言<sup>326</sup>足。大王若勅侍臣立<sup>327</sup>斷王首，坐時乃<sup>328</sup>斷猶不得罪，況王不勅，云何得罪？王若得罪，諸佛世尊亦應得罪。何以故？汝父先王頻婆娑羅曾於諸佛種諸善根，是故今日得居王位；若佛世尊不受其供<sup>329</sup>，則不為王；若不為王，汝則不得為國興<sup>330</sup>害。汝若<sup>331</sup>殺父當有罪者，我等諸佛亦應有罪。若諸佛世尊無有<sup>332</sup>罪者，汝獨云何而得罪耶？

「大王，頻婆娑羅往有惡心，於毗富羅山遊

<sup>324</sup> 大正藏：勅

<sup>325</sup> 大正藏：但

<sup>326</sup> 大正藏：別；永樂北藏：別；龍藏：則

<sup>327</sup> 大正藏：斬

<sup>328</sup> 大正藏：斬

<sup>329</sup> 大正藏：諸佛若不受其供養；永樂北藏及龍藏：若佛世尊不受其供

<sup>330</sup> 大正藏：生

<sup>331</sup> 大正藏：若汝；永樂北藏及龍藏：汝若

<sup>332</sup> 大正藏：得



行射獵<sup>333</sup>，周遍曠<sup>334</sup>野悉無所得，唯見一仙五通具足。見已即生瞋恚惡心：『我今遊獵所以不得，正坐此人。』驅逐令去，即勅左右而令殺之。其人臨終生瞋惡心，退失神通而作誓言：『我實無辜，汝以心、口橫加屠戮<sup>335</sup>，我於來世亦當如是，還以心、口而害汝命<sup>336</sup>。』時王聞已，即生悔心，供養死尸。先<sup>337</sup>王如是尚得輕受，不墮地獄，況王不爾，而當地獄受果報耶？先王自作還自受之，云何令王而得殺罪？

「如王所言『父王無辜』者，云何言無<sup>338</sup>？夫有罪者則有罪報，無惡業者則無罪報。汝父先王若無有<sup>339</sup>罪云何有報？頻婆娑羅於現世中亦得善果及以惡果，是故，先王亦復不定；以不定故，殺亦不定；殺不定故，云何而言定入地獄？

「大王，眾生狂惑凡有四種：一者，貪狂；二者，藥狂；三者，呪狂；四者，本業緣狂。大王，我弟子中有是四狂，雖多作惡，我終不記是人犯戒。是人所作不至三趣<sup>340</sup>，若還得心亦不言

333 大正藏：獵鹿：永樂北藏及龍藏：射獵

334 大正藏：曠

335 大正藏：戮害：永樂北藏及龍藏：屠戮

336 大正藏：於汝：永樂北藏及龍藏：汝命

337 大正藏：是

338 大正藏：大王云何言無：永樂北藏及龍藏：云何言無

339 大正藏：辜

340 大正藏：惡

犯。王本貪國，興此逆害<sup>341</sup>。貪狂心作，云何得罪？

「大王，如人醉酒<sup>342</sup>，而<sup>343</sup>害其母，既醒悟<sup>344</sup>已，心生悔恨，當知是業亦不得報。王今貪醉，非本心作。若非本心，云何得罪？

「大王，譬如幻師，於四衢道<sup>345</sup>幻作種種男、女、象、馬、瓔珞、衣服，愚癡之人謂為真實，有智之人知非真有；殺亦如是，凡夫謂實，諸佛世尊知其非真。

「大王，譬如山谷<sup>346</sup>響聲，愚癡之人謂之實聲，有智之人知其非真；殺亦如是，凡夫謂實，諸佛世尊知其非真。

「大王，如人有怨，詐來親附，愚癡之人謂為真實<sup>347</sup>，智者了達，乃知虛詐；殺亦如是，凡夫謂實，諸佛世尊知其非真。

「大王，如人執鏡，自見面像，愚癡之人謂為真面，智者了達知其非真；殺亦如是，凡夫謂實，諸佛世尊知其非真。

<sup>341</sup> 大正藏：逆害父王：永樂北藏及龍藏：興此逆害

<sup>342</sup> 大正藏：酒醉：永樂北藏及龍藏：醉酒

<sup>343</sup> 大正藏：逆

<sup>344</sup> 大正藏：寤

<sup>345</sup> 大正藏：四衢道頭：永樂北藏及龍藏：於四衢道

<sup>346</sup> 大正藏：間

<sup>347</sup> 大正藏：實親：永樂北藏及龍藏：真實

「大王，如熱時燄<sup>348</sup>，愚癡之人謂之是水，智者了達知其非水；殺亦如是，凡夫謂實，諸佛世尊知其非真。

「大王，如乾闥婆城，愚癡之人謂為真實，智者了達知其非真；殺亦如是，凡夫謂實，諸佛世尊知其非真。

「大王，如人夢中受五欲樂，愚癡之人謂之為實，智者了達知其非真。殺亦如是，凡夫謂實，諸佛世尊知其非真。

「大王，殺法、殺業、殺者、殺果及以解脫，我皆了之，則無有罪。王雖知殺，云何有罪？

「大王，譬如有人主知典酒，如其不飲則亦不醉，雖復知火亦不燒燃；王亦如是，雖復知殺，云何有罪？

「大王，有諸眾生於日出時作種種罪，於月出時復行劫盜，日、月不出則不作罪，雖因日、月令其作罪，而<sup>349</sup>此日、月實不得罪。殺亦如是，雖復因王，王實無罪。

「大王，如王宮中常勅屠羊，心初無懼，云何於父獨生懼心？雖復人獸<sup>350</sup>尊卑差別，保命、

<sup>348</sup> 大正藏：炎

<sup>349</sup> 大正藏：然

<sup>350</sup> 大正藏：畜

畏死<sup>351</sup> 二俱無異，何故於羊心輕無懼，於父先王生重憂苦？大王，世間之人，是愛僮僕，不得自在，為愛所使而行殺害。設有果報，乃是愛罪。王不自在，當有何咎？

「大王，譬如涅槃，非有非無，而亦是有；殺亦如是，雖非有非無<sup>352</sup>，而亦是有。慚愧之人則是<sup>353</sup>非有，無慚愧者則為非無。受果報者名之為有，空見之人則為非有。有見之人則為非無，有有見者亦名為有。何以故？有有見者得果報故，無有見者則無果報。常見之人則為非有<sup>354</sup>，無常見者則為非無<sup>355</sup>，常常見者不得為無。何以故？常常見者有惡業果故，是故常常見者不得為無。以是義故，雖非有非無<sup>356</sup>，而亦是有。

「大王，夫眾生者，名出入息。斷出入息<sup>357</sup>故名為殺 諸佛隨俗，亦說為殺。

「大王，色是無常，色之因緣亦是無常。從無常因生色云何常？乃至識無常<sup>358</sup>，識之因緣亦是無常，從無常因生識云何常？以無常故苦，以

<sup>351</sup> 大正藏：寶命重死：永樂北藏及龍藏：保命畏死

<sup>352</sup> 大正藏：雖非有無：永樂北藏及龍藏：雖非有非無

<sup>353</sup> 大正藏：為

<sup>354</sup> 大正藏：無

<sup>355</sup> 大正藏：有

<sup>356</sup> 大正藏：雖非有無：永樂北藏及龍藏：雖非有非無

<sup>357</sup> 大正藏：斷出入息，故名為殺：永樂北藏及龍藏：（斷出入息，故名為殺）

<sup>358</sup> 大正藏：識是無常：永樂北藏及龍藏：識無常

苦故空，以空故無我。若是無常、苦、空、無我，為何所殺？殺無常者得常涅槃，殺苦得樂，殺空得實，殺於無我而得真我。大王，若殺無常苦、空、無我者，則與我同，我亦殺是<sup>359</sup>無常苦、空、無我，不入地獄。汝云何入？」

爾時，阿闍世王如佛所說觀色乃至觀識，作是觀已，即白佛言：「世尊！我今始知色是無常乃至識是無常。我本若能如是觀<sup>360</sup>者，則不作罪。世尊！我昔曾聞諸佛世尊常為眾生而作父母，雖聞是語，猶未能審<sup>361</sup>，今乃<sup>362</sup>定知。世尊！我亦曾聞須彌山王四寶所成，所謂金、銀、瑠璃、玻瓈，若有眾鳥，隨所集處則同其色。雖聞是說<sup>363</sup>，亦不審定。我今來至佛須彌山則與同色，與同色者，則知諸法無常、苦、空、無我。世尊！我見世間從伊蘭子生伊蘭樹，不見伊蘭生栴檀者<sup>364</sup>，我今始見從伊蘭子生栴檀樹。伊蘭子者，我身是也；栴檀樹者，即是我心無根信也。無根者，我初不知恭敬如來，不信法、僧，是名無根。世尊！我若不遇如來世尊，當於無量阿僧祇劫在大地獄

<sup>359</sup> 大正藏：於

<sup>360</sup> 大正藏：知

<sup>361</sup> 大正藏：猶未審定；永樂北藏及龍藏：猶未能審

<sup>362</sup> 大正藏：則

<sup>363</sup> 大正藏：言

<sup>364</sup> 大正藏：樹

受無量苦。我今有幸得見如來<sup>365</sup>，以是見佛所得功德，悉壞眾生煩惱惡心<sup>366</sup>。」

佛言：「大王，善哉！善哉！我今知汝必能破壞眾生惡心。」

「世尊！若我審能破壞眾生諸惡心者，使我常在阿鼻地獄，無量劫中，為諸眾生受大苦惱不以為苦。」

爾時，摩伽陀國無量人民悉發阿耨多羅三藐三菩提心。以如是等無量人民發大心故，阿闍世王所有重罪即得微薄。王及夫人、後宮嫔女悉皆同發阿耨多羅三藐三菩提心。

爾時，阿闍世王語耆婆言：「耆婆，我今未死已得天身，捨於短命而得長命，捨無常身而得常身，令諸眾生發阿耨多羅三藐三菩提心，即是天身、長命、常身，即是一切諸佛弟子。」

說是語已，即以種種寶幢、旛蓋、香華、瓔珞、微妙妓樂而供養佛。復以偈頌而讚歎言：

實語甚微妙 善巧於句義  
甚深祕密藏 為眾故顯示  
所有廣博言 為眾故略說

<sup>365</sup> 大正藏：見佛：永樂北藏及龍藏：有幸得見如來

<sup>366</sup> 大正藏：破壞眾生所有一切煩惱惡心：永樂北藏及龍藏：悉壞眾生煩惱惡心

具足如是語 善能療眾生  
若有諸眾生 得聞是語者  
若信及不信 定知是佛說  
諸佛常軟語<sup>367</sup> 為眾故說麤  
麤語及軟言<sup>368</sup> 皆歸第一義  
是故我今者 歸依於世尊  
如來語一味 猶如大海水  
是名第一義<sup>369</sup> 故無無義語  
如來今所說 種種無量法  
男女大小聞 同獲第一義  
無因亦無果 無生亦<sup>370</sup>無滅  
是名大涅槃 聞者破諸果<sup>371</sup>  
如來為一切 常作慈父母  
當知諸眾生 皆是如來子  
世尊大慈悲 為眾修<sup>372</sup>苦行  
如人著鬼魅 狂亂多所為<sup>373</sup>  
我今得見佛 所得三業善  
願以此功德 迴向無上道

367 大正藏：言

368 大正藏：語

369 大正藏：諦

370 大正藏：及

371 大正藏：結

372 大正藏：故

373 大正藏：作

我今所供養 佛法及眾僧  
願以此功德 三寶常存<sup>374</sup> 世  
我今所應獲<sup>375</sup> 種種諸功德  
願以破一切<sup>376</sup> 眾生四種魔  
我遇惡知識 造作三世罪  
今於佛前悔 願後更不作<sup>377</sup>  
願諸眾生等 悉發菩提心  
繫心常思念 十方一切佛  
復願諸眾生 永破諸煩惱  
了了見佛性 猶如文殊<sup>378</sup> 等

爾時，世尊讚阿闍世王：「善哉！善哉！若有人能發菩提心，當知是人則為莊嚴諸佛大眾。大王，汝昔已於毗婆尸佛初發阿耨多羅三藐三菩提心，從是以<sup>379</sup>來至我出世，於其中間未曾復墮<sup>380</sup>地獄受苦。大王當知，菩提之心乃有如是無量果報。大王，從今已往常當勤修菩提之心。何以故？從是因緣當得消滅無量惡故。」

爾時，阿闍世王及摩伽陀國一切<sup>381</sup>人民，從

<sup>374</sup> 大正藏：在

<sup>375</sup> 大正藏：當得：永樂北藏及龍藏：應獲

<sup>376</sup> 大正藏：此破壞：永樂北藏及龍藏：破一切

<sup>377</sup> 大正藏：莫造：永樂北藏及龍藏：不作

<sup>378</sup> 大正藏：妙德：永樂北藏及龍藏：文殊

<sup>379</sup> 大正藏：已

<sup>380</sup> 大正藏：墮於：永樂北藏及龍藏：復墮

<sup>381</sup> 大正藏：舉國：永樂北藏及龍藏：國一切



座而起，繞佛三帀，辭退還宮。

天行品者如雜華說。

## 嬰兒行品第二十一<sup>382</sup>

「善男子，云何名為<sup>383</sup>嬰兒行？善男子，不能起、住、來、去、語言，是名嬰兒。如來亦爾，不能起者，如來終不起諸法相；不能住者，如來不著一切諸法；不能來者，如來身行無有動搖；不能去者，如來已至<sup>384</sup>大般涅槃；不能語者，如來雖為一切眾生演說諸法，實無所說。何以故？有所說者，名有為法；如來世尊非是有為，是故無說。又，無語者，猶如嬰兒語言<sup>385</sup>未了，雖復有語，實亦無語；如來亦爾，語未了者即是諸佛祕密之言，雖有所說，眾生不解，故名無語。

「又，嬰兒者，名物不一，未知正語。雖名物不一，未知正語，非不因此而得識物；如來亦爾，一切眾生方類各異，所言不同，如來方便隨而說之，亦令一切因而得解。

「又，嬰兒者，能說大字；如來亦爾，說於大字，所謂婆喲，喲者有為，婆者無為，是名嬰

<sup>382</sup> 大正藏：大般涅槃經嬰兒行品第二十一：永樂北藏及龍藏：嬰兒行品第二十一

<sup>383</sup> 大正藏：名：永樂北藏及龍藏：名為

<sup>384</sup> 大正藏：到

<sup>385</sup> 大正藏：言語：永樂北藏及龍藏：語言

兒。啾者，名為無常；婆者，名為有常。如來說常，眾生聞已，為常法故斷於無常，是名嬰兒行。

「又，嬰兒者，不知苦樂、晝夜、父母；菩薩摩訶薩亦復如是，為眾生故，不見苦樂，無晝夜相，於諸眾生其心平等，故無父母親疎等相。

「又，嬰兒者，不能造作大小諸事；菩薩摩訶薩亦復如是，不復造作<sup>386</sup>生死作業，是名不作大事者<sup>387</sup>，即五逆也。菩薩摩訶薩終不造作五逆重罪。小事者，即二乘心。菩薩終不退菩提心而作聲聞、辟支佛乘。

「又，嬰兒行者，如彼嬰兒啼哭之時，父母即以楊樹黃葉而語之言：『莫啼！莫啼！我與汝金。』嬰兒見已，生真金想，便止不啼，然此黃<sup>388</sup>葉實非金也。木牛、木馬、木男、木女，嬰兒見已，亦復生於男、女等想，即止不啼。實非男、女，以作如是男、女想故，名曰嬰兒。如來亦爾，若有眾生欲造眾惡，如來為說三十三天常、樂、我、淨，端正自恣，於妙宮殿受於五欲<sup>389</sup>，六根所對無非是樂。眾生聞有如是樂故，心生貪樂，止不為惡，勤作三十三天善業。實是生死，無常、

<sup>386</sup> 大正藏：菩薩不造：永樂北藏及龍藏：不復造作

<sup>387</sup> 大正藏：是名不作大事。大事者：永樂北藏及龍藏：是名不作大事者

<sup>388</sup> 大正藏：楊

<sup>389</sup> 大正藏：受五欲樂：永樂北藏及龍藏：受於五欲

無樂、無我、無淨，為度眾生方便，說言常、樂、我、淨。

「又，嬰兒者，若有眾生厭生死時，如來則為說於二乘，然實無有二乘之實。以二乘故，知生死過，見涅槃樂；以是見故，則能自知有斷不斷、有真不真、有修不修、有得不得。

「善男子，如彼嬰兒於非金中而生金想；如來亦爾，於不淨中而說為淨，如來已得第一義故，則無虛妄。

「如彼嬰兒於非牛馬作牛馬想，若有眾生於非道中作真道想，如來亦說非道為道。非道之中實無有道，以能生道微因緣故，說非道為道。

「如彼嬰兒於木男女生男女想；如來亦爾，知非眾生說眾生想<sup>390</sup>，而實無有眾生想<sup>391</sup>也。若佛如來說無眾生，一切眾生則墮邪見，是故如來說有眾生。於眾生中作眾生想<sup>392</sup>者，則不能破眾生想<sup>393</sup>也。若於眾生破眾生想<sup>394</sup>者，是則能得大般涅槃。以得如是大涅槃故，止不啼哭。是名嬰兒行。

<sup>390</sup> 大正藏：相

<sup>391</sup> 大正藏：相

<sup>392</sup> 大正藏：相

<sup>393</sup> 大正藏：相

<sup>394</sup> 大正藏：相

「善男子，若有男女受持、讀誦、書寫、解說是五行者，當知是人必定當得如是五行。」

迦葉菩薩白佛言：「世尊！如我解佛所說義者，我亦定當得是五行。」

佛言：「善男子，不獨汝得如是五行，今此會中九十三萬人，亦皆同<sup>395</sup>汝得是五行。」

大般涅槃經卷第十八

<sup>395</sup> 大正藏：同於：永樂北藏及龍藏：皆同

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無大般涅槃經 (合掌三稱)

### 發願文

(一編)

志心懺悔。我(某甲)與一切衆生，從無始來，  
迷失真心，流轉生死，六根罪障，無量無邊，圓  
妙佛乘，無以開解，一切所願，不得現前。我今  
讀誦大般涅槃經，以此善根，發露黑惡，過、現、  
未來三業所造無邊重罪，皆得消滅，身心清淨，

惑障蠲除，福智莊嚴，淨因增長，自他行願速得圓成。願諸如來常在說法，所有功德起隨喜心，迴向菩提，證常樂果。命終之日，正念現前，面見彌陀及諸聖眾，一剎那頃，生蓮華中。普願眾生，俱成佛道。

## 迴向偈

(一編)

誦經功德殊勝行 無邊勝福皆迴向  
普願沉溺諸有情 速往無量光佛刹  
十方三世一切佛 一切菩薩摩訶薩  
摩訶般若波羅蜜

## 迴向偈

(一編)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

## 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

